

Amang'ana Amazumu ga Yiesu Kiriisitu chimbu gaandikirwi na Maaroko Ubhukangati

Ikitaabhu kinu chandikirwi na Maaroko. Maaroko aari arabhirikirwa Yooohana Maaroko. Aari wumwi wa Abhakiriisitu bhe embere (Amahocha ga Abhatumwa 12:12). Amang'ana ganu aandikiri mukitaabhu kinu akagamenya bhwaheene, ku kubha, aari arahirana na abharwazi ncha Paauru (Amahocha ga Abhatumwa 13:1-13), Bharinaabha (Amahocha ga Abhatumwa 15:36-41) na Peetero (1 Peetero 5:13).

Mukitaabhu kinu, Maaroko aari araandikira Abhakiriisitu bhu urubhiri rwa Ruumi. Ribhaga riyo Neero newe aari umutimi wa Ruumi, na kwari ni inyaaku kuBhakiriisitu. Maaroko akeenda kokong'ya Abhakiriisitu mubhwisirirya kwa kubhabhukurira, bhareenderwa kunyaakibhwa chimbu Kiriisitu aanyaakiibhwi na kukwa.

Maaroko areerecha amiisigi gu ukwandika ikitabhu kinu kurukiriri rwe embere,

“Ing'ana Inzumu iguru wa Yiesu Kiriisitu,

Umwana wa Mungu.”

Areenda abhasumi bhaazi bhamenye kubha, Yiesu newe Kiriisitu, wunu Mungu aatumiri chimbu aaragin'yi. Mukitaabhu kinu, Maaroko aragambira amaru ganu Yiesu aari arakora kukira ganu aari akurwaza. Maaroko akaandika ebherenjo na

amaganu gi ibhisigu ibhindi bhinu Yisu aakuriri. Yisu akahorya abhaatu, akaruusha amasambwa na kubhabheerera abhaatu ubhubhi bhwabhu. Gayo gareerekan'ya ubhunaja bhwa Yisu, kubha akarwa kwa Mungu, akaaza na kuhurucha ubhubhu bhwazi kwa kubharuusha abhaatu kurwa muzinguru za ubhubhi.

*Yoohana arakonza inzira iguru wa Yisu
(Mataayo 3:1-12; Ruuka 3:1-18; Yoojana 1:19-28)*

¹ Bhunu nebhwe ubhutangi bhw Ing'ana Inzumu iguru wa Yisu Kiriisitu,* Umwana wa Mungu.†

² Chimbu yandikirwi na umuruatiriri Isaaya mukitabhu chazi kubha, Mungu akabhuga, “Rora, niratuma umutumwa waani mubhutangi bhwazu, wunu arakokonzere inzira.‡

³ Umutumwa wunu ni-wunu akuragan'ya mwitirigu, ‘Mokore inzira ya Umukuru, mogorore ibhahitu bhyazi!’”§

⁴ Umutumwa wuyo aari arabhirikirwa Yoojana. Aari mwitirigu ararwazira abhaatu kubha, bhatigi ubhubhi na ukubhatiizwa, korereke Mungu abhabheerere ubhubhi bhwabhu.

⁵ Abhaatu bhaaru kurwa kurubhiri rwa Yirusarimu na mucharu chasi cha Yudeya, bhaari bharaja kwa Yoojana. Bhakatiga ubhubhi bhwabhu, akabhabhatiiza mukitaaru cha Yorodaani.

* **1:1 Kiriisitu.** Kumaragirira bhukung'u, rora Ikiniibhasa. † **1:1 Umwana wa Mungu.** Kumaragirira bhukung'u, rora Ikiniibhasa.

‡ **1:2** Rora Maraaki 3:1. § **1:3** Rora Isaaya 40:3.

6 Yoohana aari ibhuhiri ubhuzuki bhwi ingamiya, no omokena gwa riseero mukiribhizi.* Ibhyakurya bhyazi bhyari zingigi nu ubhwaki bhwa mwitirigũ.

7 Aari ararwaza arabhuga, “Hanũ nikumara inyi, araaza umutu wu ubhunaja kunkira. Nitakwenderwa nũrũ kwihinya kutazura zisiri zi ibhikwira bhyazi.†

8 Inyi nirabhabhatiiza kwa amanzi, nawe ewe arabhabhatiiza kwe Ekoru Indindu.”‡

*Yĩsu arabhatiizwa no okogemwa mwitirigũ
(Mataayo 3:13-4:11; Ruuka 3:21-22, 4:1-13)*

9 Ribhaga riyo, Yĩsu akaaza kurwa mũrubhiri rwa Nazariiti, mucharu cha Gariraaya. Wũsi Yoohana akamabhatiiza makitaaru cha Yorodaani.

10 Hanũ Yĩsu aari aratiira kurwa mumanzi, akarora risaaru ririigũka, ne Ekoru Indindu iriika kwewe nchi ikiguuti.

11 Riraka kurwa mwisaaru rikabhuga, “Awi ni-Mwana waani umusiigwa, nizumiriirwi na naawi.”

12 Hayohayo Ekoru Indindu ikamukangata Yĩsu kuja mwitirigũ.

13 Akiikara iyo siku merongo ene, aragemwa na Shitaani.§ Aari hamwimwi ni ibhityinyi bhya

* 1:6 Zengebho zinu Yoohana aari akwibhoha, zaari ncha zu umarutiriri iriya. Rora 2 Abhatimi 1:8. † 1:7 Ariibhi umugini arasikira munyumba, mbusa wi iyaasi bhukung’u aari aramuru-usha ibhikwira na kwoja amaguru gaazi. ‡ 1:8 Ekoru Indindu. Kũmaragirira bhukung’u, rora Ikiniibhasa. § 1:13 Shitaani. Kũmaragirira bhukung’u, rora Ikiniibhasa.

mwitirigu, na bhamaraika* bha Mungu bhaari bharamwangerira.

*Yisu aratanga korobhora abhiga bhaazi
(Mataayo 4:12-22; Ruuka 4:14-15, 5:1-11)*

¹⁴ Zikahita siku nzaru, Yohana akabhohwa. Hanu aari mokebhoho, Yisu akaja mucharu cha Gariraaya, aari ararwaza Ing'ana Inzumu ya Mungu.

¹⁵ Aari arabhuga, “Ribhaga rinu ryaruturiirwi rihikiri, nu ubhuti bhwa Mungu† bharaariiri. Mmbe, mutigi ubhumbi bhwanyu, mwisiriryi Ing'ana Inzumu yiyo.”

¹⁶ Rusiku rumwi, hanu Yisu aari akahita rusizu wi inyanza ya Gariraaya, akarora Simuni nu umunyi waazi Andureya. Bhaari bhararekera zenzero manyanza, ku kubha bhaari abhawisini.

¹⁷ Yisu akabhabhurira, “Muntuni na niinyi nirabhakora kubha abhawisini bha abhaatu.”

¹⁸ Hayohayo, bhakazitiga zenzero zaabha, bhakatuna Yisu.

¹⁹ Yisu akaja embere hamwimwi na abhiga bhaazi bhabhiri. Akarora Yaakobho nu umunyi waazi Yohana abhaana bha Zebhedaayo, bhaari mubhwatu bharazomya zenzero zaabha.

²⁰ Ribhaga riyoriyo, akabhabhirikira bhamutuni, bhabhi abhiga bhaazi. Bhakatiga wiisi hamwimwi na abhahocha bhaazi mubhwatu, bhakatuna Yisu.

* **1:13 Bhamaraika.** Kamaragirira bhakung'u, rora ring'ana maraika muKiniibhasa. † **1:15 Ubhuti bhwa Mungu.** Kamaragirira bhakung'u, rora Ikiniibhasa.

*Yisu areerecha ubhunaja bhwazi
(Ruuka 4:31-37)*

²¹ Neho Yisu na abhiiga bhaazi bhanu, bhakaja murubhiri rwa Kapirinaumu. Hanu urusiku rwa ubhuturu[‡] rwahikiri, bhakasikira mwirwaziru,[§] Yisu akatanga kwija.

²² Amiija gaazi gakabharuguurya abhaatu bhusi bhanu bhaari bharamwitegeerera. Aari ariija nchu umuntu wu ubhunaja, na itaari chimbu abhiija bhaabhu bhi imigiru* ja Musa bhahiija.

²³ Mwirwaziru ryabhu, mwari nu umuntu wanu aari na risambwa. Akatiirya riraka,

²⁴ arabhuga, “Awi Yisu wa Nazariiti, utatunyaacha! Nangu, wiiziri kuturicha? Nikwizi awi ni-wiwi, awi ni-Murindu wa Mungu.”

²⁵ Yisu akarihaarira risambwa riyo akabhuga, “Kira! Nuurwi kumuntu wanu!”

²⁶ Risambwa rikasingisha umuntu wuyo bhukung’u, rikarira kwiraka na kumurwiku.

²⁷ Abhaatu bhusi bhakarugura bhukung’u, bhakiibhuurya, “Ni-ki kinu? Ni-miija mahya, ganu ubhunaja! Rora, ana amanaga gu ukhaarira na amasambwa, guusi garamwigwa.”

²⁸ Itaagigiri ibhaga irihu, abhaatu kurwa mucharu chusi cha Gariraaya, bhakabha bhiigwiri amang’ana ga Yisu.

*Yisu arahorya abharwiri bhaaru
(Mataayo 8:14-17; Ruuka 4:38-41)*

[‡] **1:21 Urusiku rwa ubhuturu.** Kamaragirira bhukung’u, rora Ikiniibhasa. [§] **1:21 Rirwaziru.** Kamaragirira bhukung’u, rora Ikiniibhasa.

* **1:22 Abhiija bhi imigiru.** Kamaragirira bhukung’u, rora Ikiniibhasa.

29 Hanu bhaaruuri mwirwaziru, bhakaja hamwimwi na Yaakobho na Yoohana kuhika wa Simuuni na Andureya.

30 Hanu bhaahikiribhu, Yisu akabhuurirwa kubha, uninabhyara Simuuni ari munyumba ahindiiri, murwiri we ehooma.

31 Neho Yisu akiisuka hanu aari, akamugwata okobhoko, akamununga. Ribhaga riyoriyo uninabhyara Simuuni akahora, akatanga kubhahokerya ibhyakurya.

32 Urusiku ruyo rigoroobha, hanu abhuturu bhwasiriri, abhaatu bu urubhiri ruyo bhaari bharareetera Yisu abharwiri, na bhanu bhaari na amasambwa.

33 Abhaatu bhaaru kurwa murubhiri rurya, bhakarumana kurukungu rwi inyumba ya Simuuni na Andureya.

34 Yisu akahorya abhaatu bhaaru bhanu bhaari na amarwiri gugusi. Na akaruusha amasambwa maaru, nawe ataari aragatiga amasambwa kubha gagambi, ku kubha gakamenya kubha ewe ni-Mwana wa Mungu.

*Yisu ararwazira abhaatu
(Ruuka 4:42-44)*

35 Mozengoko, Yisu akabhuka, akaja ahagero hanu hataari na abhaatu, akatanga kusabha.

36 Hanu Simuuni na abhakindichazi bhaabhwini atari munyumba, bhakaja komomohya.

37 Hanu bhaamubhwini, bhakamubhurira, “Abhaatu buhisi bharakomohya!”

38 Akabhagarukirya, “Tuji muzimbiri izindi za haguhi na ranu, korereke nirwaziyu, ku kubha niiziri komeremo giyo.”

39 Neho akahita mucharu chusi cha Gariraaya na kurwaza mamarwaziru gaabhu, na kuruusha abhaatu amasambwa.

*Yisu arahorya umuutu we ebhegeenge
(Mataayo 8:1-4; Ruuka 5:12-16)*

40 Rusiku rumwi umuutu we ebhegeenge akaja kwa Yisu. Akahigama, akamwisasaama, “Uraasiigi, uratura kumbingukya!”

41 Yisu akamororera ibhigangi, akagorora okobhoko kwazi na kumukun’yaku umurwiri, akamubhaurira akabhuga, “Nisiigiri. Bhingukibhwa!”

42 Rogendo rumwi ebhegeenge bhikamurwiku, akabhinguka.

43 Yisu akamorecha kwa kumuruushaho bh-wangu,

44 akamubhaurira, “Utagema kubhaurira muutu ing’ana ryaryasi. Nawe, nuuji wiiyeereken’ye kwa kuhaani,[†] na uhuruchi ikimweso[‡] chu ukubhingukibhwa kwazu, chimbu Musa aaswajiryi, kwerecha abhaatu kubha ubhingukiibhwi.”

45 Nawe, umuutu wurya akabhuka harya, akatanga kuraarika habhwiru ring’ana ryu ukuhuribhwa kwazi. Iguru wa gayo, Yisu akatamwa kusikira habhwiru muzimbiri zuzuzi ziry. Akiikara umwene hagari igutu wa zimbiri,

[†] **1:44** Kuring’ana ni imigiru ja Musa, **kuhaani** nowe aari aramenyeekererya kubha umuutu abhingukiibhwi ebhegeenge. Rora Abharaawi 14:1-32; Amahiityu gi Imigiru 24:8. Kmaragirira bhukung’u, rora ring’ana **abhakuhaani** muKiniibhasa. [‡] **1:44** **Ikimweso**. Kmaragirira bhukung’u, rora Ikiniibhasa.

nurubhu abhaatu kurwa mbaara zusi bhaari bharamujaku.

2

*Yisu arahorya umutu wenu akuuri ibhiimu
(Mataayo 9:1-8; Ruuka 5:17-26)*

¹ Yisu akagaruka naatu Kapirinaumu. Zikahita siku suuhu, abhaatu bhakiigwa kubha ari yika.

² Bhakiibhiringa bhaaru munyumba murya, kuhika kukisiku hataari na hakuhita. Yisu aari arabharwazira abhaatu ing'ana ya Mungu.

³ Hanu aari ararwaza, bhakaaza abhaatu bhane, bhagigiri umutu wenu akuuri ibhiimu kukiragu.

⁴ Bhakatamwa kumusikirya hanu Yisu aari, ku kubha ya riribhita ikuru. Bhakatiira kwirengo ryi inyumba, bhakahobhora rirengo iguru wa hanu Yisu aari, bhakiicha umutu wenu akuuri ibhiimu ari kukiragu. ⁵ Hanu Yisu aaruzi ubhwisirirya bh-wabhu, akabhurira umutu wenu akuuri ibhiimu, "Mwana waani, ubhubhi bhwazu bhubhirirwi."

⁶ Nawe, bhakiikara hayo abhiija obhorebhe bhi imigiru ja Musa. Bhaari bhariiseega mumuyu jabhu,

⁷ "Ndora umutu wenu aragambabhu? Ararega Mungu! Atareeho umutu wenu akutara kobheer-
era ubhubhi, nawe Mungu umwene!"

⁸ Rogendo rumwi Yisu akamenya amiisigi gaabhu, akabhaurira, "Kwaki muriiseegabhu mumuyu janyu?"

⁹ Awii, ni-ryahe rinyuhu, kubhurira umutu wenu akuuri ibhiimu, 'Ubhubhi bhwazu bhubhirirwi,' kisha kumbhurira, 'Imirira, ogege ikiragu chazu uji'?

10 Nangu nereenda momenye kubha, Umwana wu Umuntu* ahirwi ubhunjaja bhwo okobheerera abhaatu ubhubhi kusi.” Nehu Yisu akabhurira umuntu wanu akuuri ibhiimu,

11 “Nirakubhurira, imirira! Gega ikiragu chazu, uji yika.”

12 Hayohayo, bhusi bhakarora umuntu wuyo akiimirira, akiitwika ikiragu chazi, akahurika igutu. Abhaatu bhayo bhakarugura na kugunga Mungu, bhakabhuga, “Tukiri korora kisigu ncha kinu kikirirwi reero!”

*Yisu iiziri kusabhura abhakuri bha amabhi
(Mataayo 9:9-13; Ruuka 5:27-32)*

13 Yisu akaja naatu rusizu wi inyanza ya Gari-raaya. Abhaatu bhaaru bhakamutuna, akabhijja.

14 Akumara akabhuka, hanu aari araja, akarora Raawi umwana wa Arifaayu. Aari ikiri mwibhuru ryazi ryu ukutinira riguti. Yisu akamubhurira, “Ntuna.” Raawi akabhuka, akamutuna.

15 Yisu akaja kurya ibhyakurya munyumba ya Raawi hamwimwi na abhiga bhaazi. Abharihya bha riguti† na abhandi bhu ubhubhi bhaari bhararya ibhyakurya hamwimwi nabhu, ku kubha bhaaru bhe eteemwa yinu bhaari bharamutuna.

16 Mmbe abhijja bhi imigiru bhanu bhaari Abhafarisaayo,‡ hanu bhaaruzi Yisu ararya hamwimwi na abharihya bha riguti na abhakuri

* **2:10 Umwana wu Umuntu**, ni-riina irindi rya Yisu, ariigambira umwene. Kamaragirira bhukung’u, rora Ikiniibhasa. † **2:15 Abharihya bha riguti**. Kamaragirira bhukung’u, rora Ikiniibhasa. ‡ **2:16 Abhafarisaayo**. Kamaragirira bhukung’u, rora Ikiniibhasa.

bhu ubhubhi, bhakabhuurya abhiga bhaazi, “Ndora ararya hamwimwi na abharihya bha rigati na abhakuri bhu ubhubhi?”

¹⁷ Hanu Yisu iigwiribhu, akabhabhurira, “Abhaatu abhahuru bhatakwenda umugabhu, nawe abharwiri nebho bhakumwenda! Inyi nitiiziri kubhirikira bhe eheene, nawe bhu ubhubhi.”

Amiija gi ikari na amahya

(Mataayo 9:14-17; Ruuka 5:33-39)

¹⁸ Ibhaga irebhe, abhiga bha Yoohana Umubhatiizi hamwimwi na Abhafarisaayo, bhaari bhariiyima kurya. Rusiku ramwi abhaatu obhorebhe bhakaja kwa Yisu, bhakabhuurya, “Ndora abhiga bha Yoohana na abhiga bha Abhafarisaayo bhatakurya, nawe abhiga bhaazu bhatakwiyima kurya?”

¹⁹ Yisu akagarukirya, “Abhahirikiriri bhu umukwiri bhariiyimabhwiri kurya, bhari hamwimwi nu umukwiri? Ribhaga ryasi bhari hamwimwi, bhatakutara kwiyima kurya!

²⁰ Nawe urusiku ruraaza umukwiri ararusibhwa gati wa abhagini bhaazi. Hayo neho, bhariiyimi kurya.

²¹ “Ukusanja amiija gaani amahya na zisimuka zaanyu kuratuubhana na ukutura ikiraka che engebho iihya kongebho ikungu. Ikiraka kirya kiranyarya engebho yiyo na kwongera hanu hanyariri.

²² Ekerenjo ikindi ni-ncha abhaatu kutiga kutura idivaayi§ yinu itatunduuriri mubhiguzi bhya amaseero amakungu. Hanu ikatundura na

§ 2:22 *Idivaayi*. Kamaragirira bhukung'u, rora ikiniibhasa.

kutiira, ikiguzi kiratamwa kubhimba, akumara kirabhaaruka idivaayi iriitika. Idivaayi yinu itatunduuriri ereenderwa kutuurwa makiguzi ikihya.”

*Yisu newe Umakuru wu urusiku rwu ubhuturu
(Mataayo 12:1-8; Ruuka 6:1-5)*

²³ Rusiku rumwi rwu ubhuturu, Yisu na abhiiga bhaazi bhaari bharahita kunzira yinu yaari mumigundu ji inganu. Abhiiga bhaazi bhakatanga kutina ibhigara bhyi inganu na kurya.

²⁴ Neho Abhafarisaayo bhakabhurira Yisu, “Rora, abhiiga bhaazu bharahocha emeremo ginu gitakwenderwa kokorwa urusiku rwu ubhuturu!”*

²⁵ Yisu akabhagarukirya, “Mutasumiri muMaandiku Amarindu chimbu Daudi aakariri hanu inzara yamuriiri na abhakindichazi?”

²⁶ Akasikira mwibhuru ririndu rya Mungu, ribhaga rinu Abhiyatari aari kuhaani umakuru wa Mungu, akarya imikaati ginu jatiirwi mubhutangi bhwa Mungu.† Imikaati ginu kumigiru ja Musa gitakwenderwa kuriibhwa na abhaatu, kuruushaku bhakuhaani abheene. Nawe Daudi akarya, na akabhaha na abhakindichazi, bhushi bhakarya.”

²⁷ Neho Yisu akabhabhurira, “Urusiku rwu ubhuturu rwatiirwi iguru wa abhaatu, itari abhaatu iguru wu ubhuturu.

²⁸ Na momenye kubha, Umwana wu Umuntu ni-Makuru nuuru urusiku rwu ubhuturu.”

* **2:24** Rora Kukuruka 20:8-11. † **2:26** Rora 1 Samwiri 21:1-6.

3

*Yiisu arahorya umuntu urusiku rwu ubhutururu
(Mataayo 12:9-14; Ruuka 6:6-11)*

¹ Urusiku urundi rwu ubhutururu, Yiisu akasikira mwirwaziruru rya Kaporinaumu, aareho umuntu wunu arimiiri okobhoko.

² Abhafarisaayo bhaari bhiitigiri Yiisu, bharore ariibhi arahorya umuntu wuyo urusiku rwu ubhutururu. Areemohorye bhabhone inzira yu ukumwinatiriryaku.

³ Yiisu akabhurira omorema wo okobhoko, “Nauzi, wiimiriiri gatigati.”

⁴ Neho Yiisu akabhabhuurya, “Nangu, ni-bhwaheene kurusiku rwu ubhutururu, kokora amazumu kisha kokora amabhi, kohorya kisha kwita?” Ebho bhakakira.

⁵ Yiisu akabharora kubhururu, akarumika mumwuyu gwazi iguru wu ubhukung’u bhwi imyuyu jabhu. Neho Yiisu akabhurira umuntu wurya, “Gorora okobhoko kwazu.” Umuntu wurya akagorora okobhoko kwazi, rogendo rumwi kukahora!

⁶ Hayohayo Abhafarisaayo bharya bhakahuruka igutu, bhakarumana na kugambana na abhasakirya bha riribhita ryu umutimi Heroode Antipaasi.* Bhakagambana chimbu

* **3:6 Abhasakirya bha riribhita ryu umutimi Heroode Antipaasi** bhaari riribhita rya Abhayaahudi rinu ryisiriirya ubhukangati bhwa Abharuumi mucharu chabhu. Ebho na Abhafarisaayo bhataasiigiri, nawe bhuusi bhaari bharubhaha komenyekana kwa Yiisu mucharu chusi, neho bhakatanga kwisiriran’ya komohya inzira yu ukwita Yiisu. Kamaragirira bhukung’u, rora ring’ana Heroode Antipaasi muKiniibhasa.

bharaarichi Yisu.

Abhaatu bhaaru bharamujaku Yisu

⁷ Yisu akabhuka hayo, akaja kanyanza ya Gari-raaya hamwimwi na abhiga bhaazi. Riribhita ikuru rya abhaatu rikamutuna kurwa mubhyaru bhya Gariraaya na Yudeya,

⁸ urubhiri rwa Yirusarimu, na Idumaaya, imwambuku wi ikitaaru cha Yorodaani na haguhi na zimbiri za Tiuro na Siduni. Abhaatu bhayo bhakamujaku, ku kubha bhaari bhiigwiri iguru wi ibhisigu bhina aari akuriri.

⁹ Yisu akabhurira abhiga bhaazi bhakonz ubhwatu, ku kubha riribhita rirya ryari ikuru bhukung'u, hanu riraamuhigi asikiri mubhwatu.

¹⁰ Abharwiri bhaari bharahigana korereke bhamukun'yiku, ku kubha aari ahuriryi bhaaru.

¹¹ Abhaatu bhanu bhaari na amasambwa hanu bhaamuruzibhu, bhaari bharagwa kumaguru gaazi na kurira kwiraka ikuru, "Awi ni-Mwana wa Mungu!"

¹² Neho akagarecha amasambwa kwa bhaari, gatamukumucha kubhaatu kubha ewe ni-wiwi.

Yisu ararobhora abhatumwa ikumi na bhabhiri (Mataayo 10:1-4; Ruuka 6:12-16)

¹³ Yisu akatiira kukiguru. Akabhabhirikira abhaatu bhanu iindiri, bhakamujaku.

¹⁴ Akarobhora abhaatu ikumi na bhabhiri bhanu aabhabhirikiiri abhatumwa,[†] korereke bhabhi hamwimwi nawe, abhatumi kurwaza,

¹⁵ na abhahi ubhunaja bhwu ukuruusha amasambwa kubhaatu.

[†] **3:14 Abhatumwa.** Kugaragira bhukung'u, rora ikiniibhasa.

16 Ganu nego amariina ga abhaatu ikumi na bhabhiri bhanu aarubhwiri:

Simuuni, wanu Yisu aamuhiri iriina irindi, Peetero,‡

17 Yaakobho na Yoohana abhaana bha Zehedaayo, Yisu akabhaha iriina rya Bhowanirigi, enzobhooro yaku abhaana bhu umurumo,

18 Andureya, Firipu, Bhatomayo, Mataayo, Tomaaso, Yaakobho umwana wa Arifaayu, Tadaayo, Simuuni Umukananayu,§ enzobhooro yaku ni-mwitaniiri wi icharu chazi,

19 na Yuuda Isikariyuti, wanu iichuriri Yisu.

Yisu ni-mukuru kukira umukuru wa amasambwa (Mataayo 12:22-32; Ruuka 11:14-23, 12:10)

Akumara Yisu akagaruka yiika, akasikira munyumba.

20 Riribhita rya abhaatu rikiibhiringa harya kwiki, kuhika Yisu na abhiga bhaazi bhakatama nuru kurya ibhyakurya.

21 Hanu unina na abhahiiri bhaazi bhiigwiri amang'ana gayo, bhakaja komogega, bhaari bharabhuga amang'ini gatari bhwaheene.

22 Abhiija bhi imigiru ja Musa, bhanu bhaaruuri marubhiri rwa Yirusariimu bhaari bharabhuga, "Atiirirwi na Bhirizibhuri. Araheebha amasambwa kubhuna bha Bhirizibhuri,* umukuru wa amasambwa!"

‡ 3:16 **Peetero**, enzobhooro yaku ni-ritari. § 3:18 **Simuuni Umukananayu** aari na amariina abhiri, irimwi ryi Ikigiriki, Simuuni Umuziruuti irindi ryi Ikiyaahudi, Simuuni Umukananayu. Guusi gane enzobhooro yimwi, umutu wanu akwitaniira ubhwiya-gaaruri bhwi isi yaazi. * 3:22 **Bhirizibhuri** ni-riina irindi rya Shitaani.

23 Mmbe, Yisu akabhabhikirira, akatanga kubhabhūrira kobherenjo, “Shitaani araturabhwī kwiruusha umwene?

24 Ariibhi abhaatu bhu ubhūtimi bhūmwī bhariitana abheene kobheene, ubhūtimi bhuyo bhuragwa.

25 Na abhaatu bhi inyumba yimwi ariibhi bharatanga kwitana abheene kobheene, ikishoko kiyo kitakurama nūru hasuuhu.

26 Ariibhi Shitaani ariitana na amasambwa amakindichazi, ubhūtimi bhwazi bhutwanikiini, bharatura kwimūrirabhwī? Bhutakutura kwimūririra nūru hasuuhu, maheene bhugwiri kimwi.

27 Atareeho umūtu wanu akutura kusikira munyumba yu umūtu wa amanaga, na kumuruusha ebhegero bhyazi, akiri komobhoha. Areemobhohe, hayo aratura kumuruusha ebhegero bhyazi.

28 “Nirabhabhūrira amaheene, abhaatu bharabheererwa ubhubhi bhwabhu bhwasi. Na bharabheererwa ekerege chabhu chasi.

29 Nawe, ariibhi umūtu ararega Egoro Indindu, atakobheererwa nūru hasuuhu. Wuyo arabha ni isoro ryu ubhubhi bhwa kemerano.”

30 Yisu akabhabhūrirabhu, ku kubha ebho bhaari bharabhuga, “Ana risambwa.”

*Abhahiiri bha Yisu bha amaheene
(Mataayo 12:46-50; Ruuka 8:19-21)*

31 Neho unina Yisu na abhahiiri bhaazi bhakahika, bhakiimūririra igutu wi inyumba yinu aarimu. Bhakatuma umūtu abhikiriri Yisu, bhagambani neewe.

32 Riribhita ikuru rya abhaatu ryari ryikiri, rimwinaariri. Bhakamubhūrira Yisu, “Rora,

onyoko na bhaumwanyu bhari igutu, bharakwenda.”

³³ Yīsu akabhagarukirya, “Yiia na bhaumwitu, ni-bha wiwi?”

³⁴ Akabharora abhaatu bhanu bhiikiiri bhamwinaariri, akabhuga, “Morore, bhanu nebho bha yiia na bhaumwitu.

³⁵ Umuntu wawusi wanu akokora ubhwindi bhwa Mungu, wuyo newe umwitu, umusubhaati na yiia.”

4

Ekerenjo chu umubhusuri wa zimbusuru (Mataayo 13:1-9; Ruuka 8:4-8)

¹ Yīsu akatanga kwija kwiki abhaatu, rusiza wi inyanza. Riribhita ikuru rya abhaatu rikiibhiringa kwawi. Akasikira mubhwatu, akiikara muyo korereke bhatamurimbya. Abhaatu bhakasaaga rusiza wi inyanza.

² Aari arabhiija amang’ana maaru kobherenjo. Mumija gaazi aari arabhuga,

³ “Mwitegeerere! Umubhusuri akaja kubhusura zimbusuru zaazi. ⁴ Hanu aari arabhusura, zimbusuru izindi zikagwa kanzira, ibhinyunyi bhikaaza, bhikazirya.

⁵ Izindi zikagwa kukurungutari, zikamera bhwangu, ku kubha rirobha ryari isuuhi.

⁶ Hanu umwi gwabhariri, gukumya rirobha rirya, zimbusuru zikanyaara na kwama, ku kubha imiri jaku jari iguruguru.

⁷ Zimbusuru izindi zikagwa mumahwa. Amahwa gayo gakakura, gakazihiza, zikatama kokong’a.

⁸ Nawe, zimbusuru izindi zikagwa kwirobha rizumu, zikamera, zikakura na kwibhura. Yimwi ikiibhura merongo itatu, iyindi ikiibhura merongo isaasabha, ni iyindi ikiibhura igana rimwi!”

⁹ Akumara akabhabhurira, “Wu ukutwi, iitegeererere.”

*Kwaki Yisu aragamba kwe ebherenjo
(Mataayo 13:10-17; Ruuka 8:9-10)*

¹⁰ Hanu abhaatu bha riribhita bhaabhuukiri, Yisu akasaaga na abhiga bhaazi ikumi na bhabhiri, na abhahimba abhandi. Neho bhakabhuurya iguru we enzobhooro ye ebherenjo bhyazi.

¹¹ Akabhagarukirya, “Imwi mubhwini iryabha ryo okomenya imbisi ya ubhutimi bhwa Mungu. Nawe abhaatu bhanu bhatakuntuna, nirabhabhurira guusi kobherenjo,

¹² korereke,
‘Bharaarore, bhatamenya ryuryusi.
Na bhariigwi, bhatoobhoora ryuryusi.
Bhataaza kwichura, bhakatiga ubhubhi, bhakab-
heererwa.’*”

*Yisu aragarura ekerenjo chu umubhusuri
(Mataayo 13:18-23; Ruuka 8:11-15)*

¹³ Neho Yisu akabhuga, “Nangu, mutamirwi kwobhoora ekerenjo kinu, irababhwiri kubhindi?”

¹⁴ Umubhusuri ni-wanu akoreetera abhandi ing’ana ya Mungu.

¹⁵ Abhaatu abhandi bhatuubhini na zimbusuru zinu zaagwiri kunzira. Hanu bhakwigwabhu

* 4:12 Rora Isaaya 6:9-10.

ing'ana ya Mungu, Shitaani ahaaza, na kuru-
ushaho ing'ana yirya mozekoro zaabha.

¹⁶ Abhandi, bhatuubhiini na zimbusuru zinu za-
agwiri kukurungutari. Hanu bhakwigwa ing'ana
ya Mungu, bharayisung'aana bhwangu kobho-
zomerwa bhwasi.

¹⁷ Nawe ku kubha bhaangi nchi ikitutu kinu
kitaana imiri, bhahaagwata ibhaga isuuhu,
zinyaaku hamwi amakung'u garaabhabhone
iguru wi ing'ana yiyo, hayohayo bharatiga
ubhwisirirya.

¹⁸ Abhandi bhatuubhiini na zimbusuru zinu za-
agwiri mumahwa. Bhariigwa ing'ana ya Mungu,

¹⁹ nawe, amahocha ga kuusi, umwuyu gwu ub-
huniibhi, nu umwuyu gwa amang'ana agandi
guriisikiri. Gayo gahaahiga ing'ana ya Mungu na
kugirya itami kwibhara imisumu.

²⁰ Na abhandi bhatuubhiini na zimbusuru zinu
zaagwiri kwirobha rizamu. Bhariigwa ing'ana ya
Mungu na kuyisung'aana na kwibhara imisumu,
ugumwi merongo itatu, ugundi merongo isaasabha
nu ugundi igana rimwi.”

Ekerenjo chi ikimuri
(Ruuka 8:16-18)

²¹ Na Yisu akabhabhurira, “Awii kunu umutu
wanu ahaacha ikimuri na kutura mwirungu ryu
ubhuriri, hamwi kukundikirya na rihuzu? Ata-
haatura iguru wi ikikungu kibhi kiramurika huusi?

²² Ibh u nimbu ryaryasi rinu ribhisirwi, rib-
hisirwi korereke rihumburwi na kubha habhwiru.
Na ryaryasi rinu rikundikiriibhwi, rikundikiri-
ibhwi korereke rihumburwi.

²³ Wu ukutwi, iitegeerere.”

24 Yisu akang'eha kubhabhaurira, "Mwitegeerere bhwaheene! Muryamurya chimbu ukwihurucha kwitegeerera ring'ana, ibhu nimbu Mungu wusi akokoha ubhwabhuri, na arakwongereererya koremenya bhakung'u.

25 Wana akwitegeerera ing'ana ya Mungu na koyemenya, Mungu aramusakirya na kumwongerya koyemenya. Nawe ariibhi umutu atakwitegeerera ing'ana ya Mungu, naru isuuhu yinu aminyiri ararusibhwa."

Ekerenjo cha zendetere zinu zekomera

26 Yisu akoongera kubhabhaurira, "Nibhabhauriri ekerenjo ikindi, korereke nibhiji ubhuti bhwa Mungu chimbu bhuri. Umutu wumwi akahamba zendetere mumugundu.

27 Ubhutika ahaahindira, nu umwise ari misa, ribhaga riyo zendetere ziyo ziramera na kukura, inu umurimi atizi chimbu ikubha.

28 Rirobha riyoriyo, rirakurya zendetere zirya na kwibhura. Hinga zirahurucha amatutu, garatanga kusagata, mutinira zirahurucha ibhigara bhina bhina zeeheke.

29 Imisumu giraakong'e na girumi, umurimi aratanga kogesa."

Ekerenjo cha akadetere

(Mataayo 13:31-32, 34; Ruuka 13:18-19)

30 Yisu akang'eha kubhabhaurira, "Awii ubhuti bhwa Mungu tubhutuubhan'yi naki? Tubhutuubhan'yi na kerenjoki?

31 Bhutuubhini chimbu endetere ya umaharadaari iri hanu ikubambwa na kukura

mumugundu. Neyo isuuhu kukira zendetere zusi zinu zihahambwa.

³² Iraamere, ihaabha kitutu kiku kukira ibhitutu bhyu bhya zinyinyi mumugundu. Kirabha ni ibhisha bhya amatutu amaku, ni ibhinyunyi bhaaaza na kwikara kubhisha bhyaku.”

³³ Yisu akabharwazira ing’ana ya Mungu kwe ebherenjo bhiyo ni ibhindi bhyaru, chimbu bhanagiryi koyemenya.

³⁴ Atagambini nebho ataana kerenjo. Nawe, hanu aari umwene na abhiga bhaazi, akabhagorera gusi.

Yisu aratureerya inyanza

(Mataayo 8:23-27; Ruuka 8:22-25)

³⁵ Urusiku ruyo rigoroobha, Yisu akabhaurira abhiga bhaazi, “Twambuki inyanza, tuji imwambuku.”

³⁶ Bhakatiga riribhita rya abhaatu, bhakatiira mubhwatu munu Yisu aari, bhakabhuka hamwimwi. Haari nu ubhwatu ubundi bhanu bhakangatiin’yi nabhwi.

³⁷ Umukama umuhaari bhakung’u gakatanga kuhuuta manyanza. Amakunda gaari garahuna ubhwatu, amanzi gakatanga kusikira mubhwatu bhokeenda kwizura.

³⁸ Ribhaga riyo, Yisu zaari zimuhiriri inyuma mubhwatu, ahigikiri umutwi kumusagu. Abhiga bhaazi bhakamubhuucha, bhakabhuga, “Umwija, utakudirira kubha itwi tararika?”

³⁹ Neho Yisu akiimirira, akahama umukama gurya, akabhaurira inyanza, “Ukiri! Horeera!”

Umukama gurya gukatiga kuhuuta, kukabha bhwaheene.

⁴⁰ Mmbe Yisu akabhabhuurya abhiga bhaazi, “Kwaki murubhaha? Nangu mukiri kubha nu ubhwisirirya?”

⁴¹ Bhakubhaha bhukung’u, bhakatanga kwibhuurya, “Wanu ni-wiwi, umukama na amakunda bhyusi bhiramwigwa?”

5

*Yisu arahorya umuntu amasambwa
(Mataayo 8:28-34; Ruuka 8:26-39)*

¹ Yisu na abhiga bhaazi bhakahika imwambuku wi inyanza ya Gariraaya, mucharu cha Abhagiraasi.

² Hanu Yisu iikiri mubhwatu, umuntu wanu aari na amasambwa akarwa mumabhigi ganu gaari zimbihira,* akamuryarira Yisu.

³ Umuntu wuyo aari ariikara mumabhigi ganu gaari zimbihira. Aari na amanaga, ataari areho wuwusi wanu aaturiri komobhoha nuru kwe emenyororo.

⁴ Bhaari bhamubuhiri manga kaaru ne emenyororo kumaguru nibhirang’ani kumabhoko, nawe akabhitina bhyusi. Ataari areho umuntu wanu akutara kumuhiza.

⁵ Ibhaga ryusi ubhutika nu umwise aari aragenda kuzimbihira na mabhiguru, ararigisa na kwing’erang’era na amabhwi.

⁶ Hanu umuntu wuyo aaruzi Yisu kwa kore na kumuryarira, akamuhigamira.

* 5:2 Abhayaahudi bhaari bharabhika abhaku mumabhigi hamwi ganu gaakirisirwi kwitari ryi ibhiguru.

⁷ Akarigisa kwiraka ikuru akabhuga, “Ni-naki na naawi, Yisu Umwana wa Mungu wi Iguru wa Bhyusi? Nirakwisasaama kuriina rya Mungu utanyaacha.”

⁸ Akagambabhu ku kubha Yisu aari aribhu-uriiri, “Risambwa, nuurwi kumutu wunu!”

⁹ Yisu akaribhuurya, “Iriina ryazu wiiwi?”

Rikamugarukirya, “Iriina ryani, ni-Bhasirikari, ku kubha itwi, ni-bhaaru kumutu wunu.”

¹⁰ Risambwa rirya rikamwisasaama manga kaaru kubha atagaheebha mucharu kirya.

¹¹ Kwari na rihizu ikuru rya zingurubhi, rirariisha rusizu wi ikiguru.

¹² Neho amasambwa garya gakabhuga, “Turasabha utwisiririryi, tusikiri muzingurubhi zirya.”

¹³ Yisu akagiisiririrya. Amasambwa gayo gakarwiku umutu wurya, gakaja muzingurubhi. Rihizu ryusi rya zingurubhi rikahiringita mwega ikihiringitu ikihaari, zikagwa manyanza na kukwa. Zingurubhi ziyo zaari zirahika bhikwi bhibhiri.

¹⁴ Abhariisha bha zingurubhi bharya bhakar-yara, bhakaragan’ya amang’ana gayo muzimbiri. Abhaatu bhakaaza, korereke bhiirorere abheene ganu gakurirwi.

¹⁵ Hanu bhaahikiri kwa Yisu, bhakubhaha bhukung’u korora wunu aari na riribhita rya amasambwa ikiri, ibuhiri zengebho na ana amang’ini gakunaaniri.

¹⁶ Bharya bhaaruuzi ganu gaamubhwini wunu aari na amasambwa na zingurubhi, bhakabha bharabhurira abhaatu abhandi amang’ana gayo.

17 Neho abhaatu bhakatanga kusabha Yisu arwi mucharu chabhu.

18 Hanu Yisu aari akusikira mubhwatu, umutu wanu aari na amasambwa akasabha Yisu kubha amwisiririryi bhahirani nawe.

19 Nawe Yisu atamwisiririiryi, akamubhurira, “Nuuji iwaanyu, ubhabhuriri amang’ana amakuru gi ibhigungi ganu Umukuru akukuriiri.”

20 Umutu wuyo akabhuka akaja, akatanga kunyaragan’ya amang’ana Dikapuri, amang’ana amakuru ganu Yisu aamukuriiri. Abhaatu bhushi bhakarugura.

*Yisu arahorya umukari na kurya umuucha
(Mataayo 9:18-26; Ruuka 8:40-56)*

21 Yisu na abhiga bhaazi bhakaambuka inyanza nu ubhwatu kugaruka imwambuka. Hanu bhaahikiri, riribhita ikuru rya abhaatu rikiibhiringira rusizu wi inyanza.

22 Hayo akaaza umukangati wumwi mwirwaziru, iriina ryazi Yairu. Hanu aaruzi Yisu, akamujaku, akagwa mumaguru gaazi.

23 Akamwisasaama arabhuga, “Umuucha waani murwiri, areenda kutin’ya. Nirasabha tuji omoteere amabhoko gaazu kumubhiri gwazi, korereke ahone.”

24 Yisu akahirana nawe. Riribhita rirya rikabha riramutuna, rimwirugutiriiryi bhukung’u.

25 Mwiribhita rirya, kwari nu umukari wanu aari nu ubhurwiri bhw ingizi kwi imyaka ikumi ni ibhiri.

26 Umukari wuyo aari anyaakiri bhukung’u kuja kubhagabhu. Akamara ebhegero bhyazi bhyusi

arahira kubhagabhũ, atabhwĩni hakĩriku, nawe bhokoongera kũhaara.

27 Hanũ umũkari wuyo iigwiri ganũ Yĩisu aakũriri, akahita mwiribhita rya abhaatũ kwi inyuma, akakun'yaku engebho ya Yĩisu.

28 Akakorabhu kũ kubha akiigambira, "Niraakun'yikubhu engebho yaazi, nirahora."

29 Hayohayo ingizi ikatinika, akiyigwa mumubhiri kubha ahuriri.

30 Rogendo rumwi Yĩisu akamenya kubha amanaga gaazi gakũriri emeremo. Akiichũra, akabhuurya abhaatũ bha riribhita, "Ni-wĩwi wũnũ akuniryiku zengebho zaani?"

31 Abhũga bhaazi bhakamubhũrira, "Urarora chĩmbu abhaatũ bhaaru bhakũhigana kukwisukaku! Na naawi urabhuurya, 'Ni-wĩwi ankuniryiku?'"

32 Nawe akarora inũ ni inũ, korereke amorore wũnũ aamukuniryiku.

33 Neho umũkari wurya akubhaha,[†] akaaza akamugwaku mĩmagũrũ, inũ ararigita, kũ kubha akamenya ganũ gakũriibhwĩ kwewe. Akamubhũrira amaheene gũũsi.

34 Yĩisu akamubhũrira, "Muucha, ubhwisirirya bhwaazũ bhakũhuriryĩ. Uji no omorembe, nangũ ahũriibhwĩ."

35 Hanũ Yĩisu aari akĩri aragambana nũ umũkari wuyo, abhaatũ bhakaaza kurwa munyumba ya

[†] 5:33 KũBhayaahudi umũũtũ wi ingizi aari abhingiri, atĩndirwi kukun'yaku mũũtũ na kwisanja na abhaatũ abhandi. Rora Abharaawi 15:25-33.

Yairu, umukangati wi inyumba ya rirwaziru, bhakabhuga, “Yairu, tiga kunyaacha umwija, ku kubha umuucha waazu amariri kukwa.”

³⁶ Nawe hanu Yisu igwiri amang’ana gayo, akabhurira Yairu, “Utubhaha, isirirya.”

³⁷ Yisu akagarucha abhaatu abhandi bhushi kubha bhatakangatan’ya nawe. Akaja na Peetero, Yaakobho na Yoohana umunyi wa Yaakobho.

³⁸ Hanu bhaahikiri kunyumba ya Yairu, Yisu akabhona abhaatu bhararira na kwarama.

³⁹ Akasikira munyumba, akabhuga, “Murariraki? Umuucha wenu akiiri kukwa, nawe ahindiiri.”

⁴⁰ Riribhita rya abhaatu rikamoseka kwa kerege, nawe Yisu akabhahurucha bhushi igatu. Akagega wiisi, unina umwana na abhiga bhaazi bhatatu, bhakaja igati inu bhahindirya umuucha.

⁴¹ Akagwata umuucha wurya kokobhoko, akamabhurira, “Tariita, ikumi!” enzobhooro yaku, “Umuucha, nirakabhurira, bhuka!”

⁴² Hayohayo, umuucha wuyo akiimirira, akatanga kogenda. Aari ni imyaka ikumi ni ibhiri. Bhakarugura bhukung’u.

⁴³ Yisu akabharecha bhatabhurira wuwushi ganu gakerirwi. Akabhabhurira abhiibhuri bhu umuucha wuyo bhamohe ibhyakurya.

6

*Abhaatu bha Nazariti bharaanga Yisu
(Mataayo 13:53-58; Ruuka 4:16-30)*

¹ Neho Yisu akarwiyu, akagaruka kurubhiri rwabhu rwa Nazariti hamwimwi na abhiga bhaazi.

2 Hanu urusiku rwu ubhuturu rwahikiri, akatanga kwija mwirwazira. Abhaaru bhanu bhamwigwiri bhakarugura. Bhaari bhariibhuurya, “Wunu abhwini hayi ganu gushi? Ni-bhwubhuriki bhanu aahirwi nu ubhunaja bhwo okokora ibhisigu ncha bhiyo?”

3 Wunu atari umisirimara wurya, mura wa Mariyamu, na bhaumwabhu ni-Yaakobho, Yoose, Yuuda na Simuni? Na abhasubhaati bhaazi tutaanabhu hanu?” Bhakiigatana iguru waazi, bhakaanga kumwisirirya.

4 Yisu akabhabhurira, “Umuruririri ahaasuukwa ahandi hushi, kuruushaku murubhiri rwazi, kubhahiri bhaazi nu uwaazi.”

5 Na ataturiri kokora iyo ibhisigu bhyaru, nawe akabhaturira amabhoko abharwiri bhasuuhu na kubhahorya.

6 Akarugura bhukung’u ku kubha bhatamwisiriiri.

*Yisu aratuma abhiga bhaazi ikumi na bhabhiri
(Matayo 10:5-15; Ruuka 9:1-6)*

Akumara Yisu akiiruguura muzimbiri za haguhi kubhiija abhaatu.

7 Akabhirikira abhiga bhaazi ikumi na bhabhiri. Akabhaha ubhunaja bhu ukuruusha amasambwa, akabhatuma bhabhiri bhabhiri.

8 Akabhaswaja, “Mutagega kegero chuchusi iguru wo orogendo rwanyu kuruushaku ihimba. Mutagega isakwa, nuru ibhyakurya, nuru mpirya.

9 Mwibhohe ibhikwira, nawe mutagega ishadi ya kugarura.”

10 Akang'eha kubhabhaurira, "Munyumba yuyusi yinu bharaabhasung'aani, mwikari muyomuyo, kuhika hanu mukubhuka marubhiri ruyo.

11 Na huyusi hanu bhatakubhasung'aana hamwi kubhiitegeerera, hanu mukubhuka, mukung'uti urutu kumaguru gaanyu, kobheerecha kubha Mungu arabhaanga."

12 Abhiga bharya bhakabhuka, bhakatanga kubharwazira abhaatu kubha, bhatigi ubhubhi bwabhu.

13 Bhakaruusha amasambwa maaru na kohorya abharwiri bhaaru kwa kubhahaka amaguta.

*Yoozana Umubhatiizi aratinwa umutwi
(Mataayo 14:1-12; Ruuka 9:7-9)*

14 Umutimi wi icharu kirya, iriina ryazi Heroode Antipaasi,* akiigwa amang'ana ga Yisu, ku kubha aari aramenyekana huyu. Abhandi bhaari bharabhuga, "Ne-Yoozana Umubhatiizi aryukiri mubhaku, necho anu ubhunaja bhwo okokora ibhisigu ibhikuru."

15 Abhandi bhaari bharabhuga, "Ni-iriya."† Abhandi bhaari bharabhuga, "Ewe ni-murutiriri wa Mungu ncha abharutiriri abhandi bhi ikari."

16 Nawe hanu Heroode Antipaasi igwiri amang'ana gayo, akabhuga, "Wanu, ne-Yoozana, wanu natiniri umutwi. Aryukiri mubhaku!"

17 Heroode umwene aari aswajiryi Yoozana Umubhatiizi agwatwi na atuurwi mokebhoho.

* **6:14 Heroode Antipaasi.** Kamaragirira bhakung'u, rora ikiniibhasa. † **6:15 Rora Maraaki 4:5.**

Akakorabhu iguru wa Hirudiya umukari wa Firipu wanu aari akwirirwi neewe.

¹⁸ Yoohana aari abhuuriiri Heroode, “Ni-mugiru kwa naawi kukwira umukari wa umwanyu.”

¹⁹ Mmbe, Hirudiya akabhiihirirwa bhakung’u Yoojana, akeenda kumwita nawe akatamwa.

²⁰ Heroode akubhaha Yoojana, ku kubha akamenya kubha ewe ni-mutu we eheene na murindu, akabha aramuriibha. Hanu Heroode aari akwitegeerera Yoojana, aari ararumika bhakung’u, nawe akasiiga kumwitegeerera.

²¹ Ribhaga rikahita, urusiku rumwi Heroode akabhona inzira yu ukwita Yoojana. Kuhiita inyangi yu ukwibhurwa kwazi, akabhaginihya abhatiniri bhaazi, abhaku bha abhasirikari, na abhakan-gati bhi icharu cha Gariraaya.

²² Hanu abhagini bhiikiri, umuucha waazi Hirudiya akasikira, akabhina, Heroode na abhagini bhaazi bhakazomerwa. Umutimi akabhurira umuucha wuyo, “Nsabha chuchusi kinu ukwenda, inyi nirakoha.”

²³ Akiirahira, “Nirakoha chuchusi kinu ukwenda, nuru ritinika ryu ubhutimi bhwani.”

²⁴ Neho umuucha wurya akahuruka igutu, akabhuurya unina, “Yiia, nisabhiki?”

Unina akamubhurira, “Sabha umutwi gwa Yoojana Umubhatiizi.”

²⁵ Mmbe umuucha wurya akagaruka bhwangu kumutimi, akamubhurira, “Nereenda ong’e nangwinu umutwi gwa Yoojana Umubhatiizi kuruhungu.”

26 Umutimi akarumika bhukung'u, nawe iguru wu ubhwirahiri bhwazi mubhutangi bhwa abhagini, atindiri kumwangira.

27 Akatuma umusirikari aji kutina Yoohana umutwi. Umusirikari akaja mokebhoho, akatina Yoohana umutwi.

28 Akareeta umutwi guyo kuruhungu, akaha umuucha wuyo, akahirira unina.

29 Hanu abhiiga bha Yoohana bhiigwiri gayo, bhakaja, bhakagega ikitundu chazi, bhakakibhika.

*Yisu arariisha abhaatu bhikwi bhitaanu
(Mataayo 14:13-21; Ruuka 9:10-17; Yoohana 6:1-14)*

30 Hanu abhatumwa bhaagarukiri, bhakiibhiringa mubhutangi bhwa Yisu, bhakamubhurira guusi ganu bhaakuriri na kubhija abhaatu.

31 Kuring'aana na abhaatu bhaaru bhukung'u bhanu bhaareho, abhandi bhaari bharaaza, abhandi bhaari bharabhuka, Yisu na abhiiga bhaazi bhakatamwa kurya. Akabhabhurira abhiiga bhaazi, "Muuzi, tuji hanu hataana abhaatu, twoyeere hasuuhu."

32 Bhakabhuka abheene mubhwatu, bhakaja ahagero hanu hataana abhaatu.

33 Nawe hanu bhaabhuukiri abhaatu bhak-abharora, bhakabhamenya. Abhaatu bharya hamwimwi na abhandi kurwa zimbiri nzaru bhakabharyarira, bhakabhakangatira kuhika inu bhaari bhakuja.

34 Hanu Yisu iikiri mubhwatu, akarora riribhita ikuru rya abhaatu. Akabharorera ibhigangi, ku

kubha bhaari ncha zing'undu zinu zitaana umuri-
isha. Akatanga kubhiija amang'ana maaru.

³⁵ Hanu zaahitiri isa nzaru zu umwise, abhiiga
bhaazi bhakamujaku, bhakamubhuurira, “Hanu
turi ni-mwitirigu na bhuraariiri kwira.

³⁶ Ubharagi abhaatu bhanu, bhaji muzimbiri zinu
ziri haguhi, korereke bhiiguriri ibhyakurya.”

³⁷ Nawe, Yisu akabhagarukirya, “Imwi
mubhahi ibhyakurya.”

Bhakamubhuurya, “Oreenda itwi tuji
tubhaguriri imikaati kwa zidinaari magana
abhiri,‡ korereke tubhahi bharyi?”

³⁸ Wusi akabhabhuurya, “Muni imikaati iringa?
Muji morore.”

Bhakaja korora, bhakagaruka,
bhakamubhuurira, “Tuni imikaati itaanubhu na
ziiswi ibhiri.”

³⁹ Yisu akabhabhuurira kubha, bhiikaryi ab-
haatu bhusi kumagari kubhunyaaki ubhubhisi.

⁴⁰ Bhakiikara amagari, abhandi igana igana,
abhandi merongo itaanu itaanu.

⁴¹ Yisu akagega imikaati itaanu na ziiswi ibhiri,
akarangamira kwisaaru, akabhurira Mungu,
azumiryi. Akasunyura imikaati girya, akabhaha
abhiiga bhaazi bhabhasondye abhaatu. Na
akabhasondya bhusi ziiswi ibhiri ziryu.

⁴² Bhusi bhakarya, bhakiiguta.

⁴³ Abhiiga bhaazi bhakabhiringa amasaaju gi
imikaati na ziiswi, bhakiizurya bhihuzu ikumi na
bhibhiri.

‡ 6:37 *Zidinaari magana abhiri* yaari ni-marihi gu umuutu
wamwi kwi imyiri inaani.

44 Bhanu bhaariiri ibhyakurya bhira bhaari bhaaru, abhasubhi abheene bhaari bhikwi bhitaanu.

Yisu aragenda iguru wa amanzi

(Mataayo 14:22-33; Yoohana 6:16-21)

45 Nho Yisu akabhaswaja abhiga bhaazi bhasikiri mubhwatu, bhakangati kwambuka inyanza kuja kubhira rwa Bhisaida, ewe ari araraga riribhita rya abhaatu.

46 Na hanu bhaataaniri, akatiira kukiguru kusabha.

47 Hanu yaahikiri mukabhuribhuri, abhiga bhaari mubhwatu gatigati wi inyanza, na Yisu ari umwene kukiguru.

48 Akabharora bharanyaaka kugaha ubhwatu, ku kubha umukama gwari guruhuuta. Mbe hanu ryahikiri mumacha, akabhajaku aragenda kumanzi, akeenda kubhahitira.

49 Nawe hanu bhaamuruzi aragenda kumanzi, bhakakina ni-kihwi, bhakarigisa.

50 Hanu bhaamuruzi newe bhuzi bhakubhaha bhukung'u. Yisu akabhuga, "Mohoreere, mutubhaha! Niinyi."

51 Yisu akatiira mubhwatu bhwabhu, umukama gukatireera. Bhakarugura bhukung'u,

52 ku kubha bhatubhuriri nuru ikiruguru chi imikaati. Zekoro zaabhu zaari kung'u.

Yisu arahorya abharwiri bha Genezariti

(Mataayo 14:34-36)

53 Hanu Yisu na abhiga bhaazi bhaambukiri inyanza, bhakahika mucharu cha Genezariti. Bhakiimiirirya ubhwatu imwambuka.

⁵⁴ Hanu bhiikiri mubhwatu, abhaatu bha harya bhakamenya Yisu bhwangu,

⁵⁵ bhakiiruguura kuusi yirya yuusi. Bharagega abharwiri kubhiragu kuja huhuusi hanu bhiigwiri Yisu ari.

⁵⁶ Huhuusi harya aagiiri, ibhi muzimbiri hamwi muusi, bhakamoreetera abharwiri kurubhuuga. Bhakamusabha abhiisiririryi abharwiri bhakun'yi nuru ripindu rye engebho yaazi. Bhuusi bhanu bhaamukuniryiku, bhakahora amarwiri gaabhu.

7

Yisu araanga isimuka ya abhakarwa (Mataayo 15:1-9)

¹ Rusiku rumwi Abhafarisaayo na abhiija bhi imigiru ja Musa obhorebhe bhakaaza kurwa murubhiri rwa Yirusarimu, bhakiibhiringa kwa Yisu.

² Bhakarora abhiga obhorebhe bha Yisu bhararya ibhyakurya bhatiisaabhiri amabhoko chimbu yaari ikwenderwa isimuka yaabhu.

³ Zisiku zirya, Abhafarisaayo na Abhayaahudi buusi bhataari kurya bhatiisaabhiri amabhoko kuhika kozengokora, kuhiita isimuka ya abhakaruka bhaabhu chimbu yaari.

⁴ Hanu bhakurwa mwisoko, bhariisaabha hinga amabhoko chimbu ikwenderwa, neho bharyi. Na bharahiita zisimuka zaabhu nzaru izindi zi ikari, nchu ukwoja ebhekombe, ibhihurira ne ebhegero.

⁵ Neho Abhafarisaayo na abhiija bhi imigiru ja Musa bhakabhuurya Yisu, “Kwaki abhiga bhaazu

bhatakutuna isimuka ya abhakaruka bhitu? Ebho bhararya bhabhingiri inu bhatiisaabhiri amabhoko.”

⁶ Yisu akabhagarukirya, “Imwi ni-bhabhihi. Mungu akagamba amaheene iguru waanyu kuhitira kumurutiriri Isaaya chimbu yandikirwi kubha,

‘Abhaatu bhanu bhahaansuka kwa mang’ana ageene,

nawe zekoro zaabhu zere kore na niinyi.

⁷ Okosengera kwabhu kutaana bhweru,

ku kubha bhariiya amiiya ga abhaatu

kina ni-ga Mungu.*”

⁸ Yisu akang’eha kubhabhurira, “Imwi muratiga imigiru ja Mungu, maragwata isimuka ya abhaatu.

⁹ “Muna zinzira nzamu zu ukwanga imigiru ja Mungu, korereke mobhone kugwata isimuka yanyu!

¹⁰ Musa† akabhuga, ‘Usuki wusu na onyoko,’‡ naatu akabhuga, ‘Wuwusi wunu akutuka wiisi hamwi unina, areenderwa akwi.’§

¹¹ Nawe imwi, muriiya marabhuga, ni-bhwaheene ariibhi umutu arabhurira wiisi hamwi unina kubha, ‘Ebhegero bhina nangaturiri kukusakirya, bhibhiri Kurihani,’ enzobhooro yaku, ni-mabhanu kwa Mungu.

¹² Ukwija kwanyu kuyo, karagirya atasakirya abhiibhuri bhaazi kegero.

* **7:7** Rora Isaaya 29:13. † **7:10 Musa.** Kumaragirira bhukung’u, rora Ikiniibhasa. ‡ **7:10** Rora Kukuruka 20:12; Amahiitya gi Imigiru 5:16. § **7:10** Rora Kukuruka 21:17; Abharaawi 20:9.

13 Ibhu murachura imigiru ja Mungu, korereke munaji kuhiita zisimuka zaanyu abheene. Na murakora maaru ganu gatuubhiini na ganu.”

*Amabhi gusisi gararwa mozekoro
(Mataayo 15:10-20)*

14 Yisu akabhirikira naatu riribhita rya abhaatu, akabhabhuurira, “Imwi, munyiitegeerere, bhusi mogoobhoore amang’ana gaani.

15 Kitareeho ekegero kinu kikusikira umuutu na kugirya abhenge. Nawe, ganu gakurwa mokoro yu umuutu nego gahaagirya abhenge. [

16 Wu ukutwi, iitegeerere.]”

17 Hanu aatigiri riribhita rya abhaatu na kusikira munyumba, abhiiga bhaazi bhakamubhuurya iguru we ekerenjo kiyu.

18 Akabhabhuurira, “Na niimwi mukiri komenya? Mutizi kubha ekegero kinu kikusikira umuutu kitakutura kugirya abhenge?

19 Ibhyakurya bhitakurumana ne ekoro, bhirahita munda aheene, bhitakwikara mamubhiri.” Ku kugambabhu, Yisu akeerecha kubha, ibhyakurya bhyusi bhyisiririibhwi kuriibhwa.*

20 Akang’eha kugamba, “Ganu gakurwa mokoro yu umuutu, nego gakugirya abhenge.

21 Mokoro yu umuutu nimu gahaarwa amiisiigi amabhi, itaaru,

22 ubhwibhi, ubhwiti, ubhusibhiiti, ubhwimani, ubhubhi, ubhukangirirya, amang’ana ga zisuni, ri-hari, amatuki, ikisiraani no obhogege.

* 7:19 Mumigiru ja Musa, Abhayaahudi bhatiisiririibhwi kurya ibhyakurya ibhindi ncha zingurubhi ni ibhisusu. Rora Abharaawi 11.

23 Amabhi gusi gayo gararwa mokoro ya umutu na garagirya abhenge.”

Ubhwisirirya bhw umukari wanu atari Umuyaahudi

(Mataayo 15:21-28)

24 Yisu na abhiga bhaazi bhakabhuka mucharu cha Gariraaya, bhakaja marubhiri rwa Tiir na Sidani. Akiibhisa iyo munyumba, atiindiri emenyekani kumutu wawusi kubha areho. Nawe atanagiri kwibhisa.

25 Kwari na umukari wumwi wanu umuucha waazi aari na risambwa, hanu ligwiri amang’ana ga Yisu, akaja akamugwira mumaguru.

26 Umukari wuyo ataari Muyaahudi, aari wa Siiriya-Funiki, akamwisasaama Yisu aruushi umuucha waazi risambwa.

27 Yisu akamubhurira, “Itari bhwaheene kogega ibhyakurya bhya abhaana na kutaashirya zimbwa.”†

28 Nawe umukari wurya akamugarukirya, “Umukuru, amang’ana gaazu ni-maheene. Nawe, hanu abhaana bhahaarya, zimbwa zihatoora amasaaju ganu gakotorobhoka.”

29 Yisu akamugarukirya, “Hayo ugambiri bhwaheene. Mmbe, bhuka, risambwa riruriku umuucha waazu.”

30 Umukari wurya akagaruka yika, akabhona umwana waazi ahuriri, irambikiri kubhuriri na risambwa rimuruuriku.

† 7:27 *Kogega ibhyakurya bhya abhaana na kutaashirya zimbwa*, enzobhooro ya ubhugambi bhanu ni-kubha, Abhayaahudi bhabhone ubhasakirya hinga abhaatu bhanu bhatari Abhayaahudi bhakiri.

Yisu arahorya umuribhi wa amatwi

³¹ Neho Yisu akabhuka na abhiga bhaazi mucharu cha Tiuro, akahita Siduni, akagaruka manyanza ya Gariraaya, mucharu cha Dikapuri.

³² Kwari nu umutu wamwi iyo, wanu aari umuribhi wa amatwi ni imuumu. Abhaatu obhorebhe bhakamoreeta kwa Yisu, bhakasabha Yisu amaturiri amabhoko, amohorye.

³³ Yisu akamuruusha mwiribhita rya abhaatu, akaja nawe umwene rusizu. Akatwira ibhyara bhyazi matwi gu umutu wurya. Akatwira amati kuchara, akamuhaka kuririmi.

³⁴ Akarora kwisaaru, akiicha ibhiikoohe, akamubhurira, “Ifata,” enzobhooro yaku, “Iguka.”

³⁵ Hayohayo, umutu wurya akaribhuka amatwi akiigwa, akatanga kugamba bhwaheene.

³⁶ Yisu akakandikija riribhita rya abhaatu kubha, bhatabhurira muti wawusi ganu akuriri. Nawe chimbu ang’ihiri kubharecha, nambu bhaang’ihiri bhukung’u kunyaragan’ya ing’ana yiyo.

³⁷ Bhakarugura bhukung’u, bhakabhuga, “Gusi ganu akuriri ni-mazumu. Arahorya abharibhi bha amatwi bhiigwi, na amamuumu gagambi!”

8

*Yisu arariisha abhaatu bhikwi bhene
(Matayo 15:32-39)*

¹ Kwibhaga riyo, riribhita irindi ikuru rya abhaatu rikiibhiringa, na ribhaga rikahita bhakasirirwa ibhyakurya. Neho Yisu akabhabhirikira abhiga bhaazi, akabhabhurira,

2 “Nirabharorera ibhigungi abhaatu bhanu, ku kubha twikiiri nabhu zisiku isatu, nangwinu bhataana ibhyakurya.

3 Niraabhugi nibhatigi bhaji iwaabhu ni inzara, bharatura kosezekera munzira, na abhandi bharuuri kore.”

4 Abhiiga bhaazi bhakamugarukirya, “Hanu ni-mwitirigu, atareeho umuntu wanu akutara kobhona imikaati ju ukwisa abhaatu bhuusi bhanu.”

5 Yisu akabhabhuurya, “Muni imikaati iringa?” Bhakamubhurira, “Tunaju muhungati.”

6 Yisu akaswaja abhaatu bhiikari haasi. Akagega imikaati muhungati girya akabhurira, Mungu, azumiryi. Akumara akasunyura, akabhaha abhiiga bhaazi, bhasondye abhaatu.

7 Kwiki, bhaari ni ibhiswi bhisuuhu. Yisu akabhurira Mungu, azumiryi, akaswaja abhiiga bhaazi bhabhahi abhaatu.

8 Abhaatu bhakarya, bhakiigata. Abhiiga bhakabhiringa amasaaju, bhakiizurya ibhihuzumu muhungati.

9 Abhaatu bhanu bhaariiri ibhyakurya bhaari bharatura kubha bhikwi bhene. Yisu akabharaga abhaatu bharya.

10 Rogendo rumwi akasikira na abhiiga bhaazi mubhwatu, bhakaja mucharu cha Darimanuta.

Abhafarisaayo bhareenda ichirikin'yu

(Mataayo 12:38-42, 16:1-4)

11 Hanu Yisu na abhiiga bhaazi bhaahikiri Darimanuta, Abhafarisaayo bhakaaza kwa Yisu. Bhakatanga kuhakaana nawe korereke bhamahaaty. Bhakamubabha akore ichirikin'yu kwerecha kubha aaruuri kwa Mungu.

12 Yisu akarumika mokoro. Akabhabhuurira, “Kwaki urwibhuru rana, moreenda ichirikin’yu? Nirabhabhuurira amaheene, urwibhuru rana rutakwerechwa ichirikin’yu chuchusi.”

13 Akabhatiga, akasikira kwiki mubhwatu na abhiga bhaazi. Bhakatanga orogendo bhakaambuka.

Ubhutunduuru bhwa Abhafarisaayo na bhwa Heroode Antipaasi
(Mataayo 16:5-12)

14 Abhiga bha Yisu bhaari bhimbiri kogega imikaati. Bhaari na umukaati gumwibhu mubhwatu.

15 Yisu akabhahama, “Mwiyangariri na kubha mису nu ubhutunduuru bhwa Abhafarisaayo na bhwa umutimi Heroode Antipaasi.”

16 Abhiga bhaazi bhakatanga kugambana abheene kobheene, bharabhuga, “Agambiribhu, ku kubha tataagigiri imikaati.”

17 Yisu akamenya guusi ganu bhaari bharagambana, akabhabhuurya, “Kwaki imwi muriimonyerera kubha, mutaana imikaati? Mukiri komenya nuru kwobhoora kegero? Ndora zekoro zaanyu zibhiri kung’u?”

18 Kwaki muna amisu, mutakorora? Muna amatwi, nawe mutakwigwa? Nangu, ndora mutakuhita?

19 Ribhaga rirya hanu nasunywiri imikaati itanu girya na kubhaha abhaatu bhikwi bhitaanu, mukabhiringa ibhihuzu bhiringa bhya amasaaju?”

Bhakabhuga, “Tukabhiringa ibhihuzu ikumi na bhimbiri.”

20 “Na hanu nasunywiri imikaati muhungati na kubhaha abhaatu bhikwi bhene, mukabhiringa ibhihuzi bhiringa bhya amasaaju?”

Bhakabhuga, “Ibhihuzi muhungati.”

21 Akumara akabhabhuurya, “Mukiri kwob-hoora?”

Yisu arahorya umuhuku

22 Yisu na abhiga bhaazi bhakahika murubhiri rwa Bhitisaida. Abhaatu obhorebhe bhakareeta umuhuku wumwi. Bhakasabha amukun'yiku na komohorya.

23 Yisu akamugwata okobhoko umuhuku wurya, akaja nawe igutu wa urubhiri rurya. Akamutwira amati kumisi, akamuturira amabhoko, akamubhuurya, “Nangu, utangiri korora chuchusi?”

24 Umutu wurya akaramucha, akabhuga, “Nirarora abhaatu, nawe bhararorekana nchi imiti gina gekogenda.”

25 Yisu akatwira amabhoko naatu kumisi, umutu wurya akakaja korora. Akatwira korora ebhegero bhyasi bhwaheene.

26 Yisu akamubhurira, “Nuuji yika, utahita murubhiri.”

Peetero ariisirira kuba Yisu newe Kiriisi
(Mataayo 16:13-20; Ruuka 9:18-21)

27 Yisu na abhiga bhaazi bhakabhuka Bhitisaida, bhakaja zimbiri za haguhi na Kaisariya-Firipi. Hanu bhaari bharagenda kanzira, Yisu akabhabhuurya, “Abhaatu bharabhuga inyi ni-wiwi?”

28 Bhakagarukirya, “Abhandi bharabhuga awi, ne-Yoohana Umubhatiizi, abhandi bharabhuga

awi, ni-iriya, abhandi bharabhuga ni-wumwi waho wa abharutiriri bha Mungu abhandi bhi ikari.”

²⁹ Ewe akabhabhuurya, “Na niimwi murabhuga inyi, ni-wiwi?”

Peetero akamugarukirya, “Awi, ni-Kiriisitu.”*

³⁰ Yisu akabhahama bhatagama kubhurira umutu wuwusi ewe ni-wiwi.

Yisu aragamba iguru wu ukukwa nu ukuryuka kwazi

(Mataayo 16:21-28; Ruuka 9:22-27)

³¹ Akumara Yisu akatanga kubhija abhiga bhaazi kubha, areenderwa Umwana wu Umutu abhone inyaaku kuru, angwi na abhakaruka, na abhakuru bha abhakuhaani, na abhija bhi imigiru ja Musa, na iitwi. Nawe urusiku rwa katatu kwima ukukwa kwazi, araryuka.

³² Yisu aari arabhurira abhiga bhaazi ring’ana riyo habhwira. Nawe Peetero akamuhira rusiza, akatanga komorecha.

³³ Yisu akiichura, akarora abhiga bhaazi. Aka-harira Peetero, “Shitaani, nuurwi mabhutangi bhwani! Amiisigi gaazu gatari ga Mungu, nawe ga abhaatu.”

³⁴ Akabhirikira riribhita rya abhaatu hamwimwi na abhiga bhaazi, akabhabhurira, “Umutu wuwusi wunu areende kuntuna, areenderwa iyangi umwene, agege umusarabha gwazi,† antuni.

* **8:29 Kiriisitu**, enzobhooro yaku ni-Masiya. † **8:34 Agege umusarabha gwazi**, nekwe ukubhuga kwisirirya Yisu nanga kukwa iguru waazi.

35 Umuntu wanu akwenda kohon'ya ubhuhuru bhwazi umwene, arabhurimirya. Nawe umuntu wanu akurimirya ubhuhuru bhwazi iguru waani ni iguru wi Ing'ana Inzamu, arabha na ubhuhuru bhwa kemerano.

36 Umuntu arabhonaki, areebhone ubhuniibhi bhwasu musu yinu, nawe arimiryi ubhuhuru bh-wazi bhwa kemerano?

37 Nangu, umuntu aratara kuhuruchaki kobhona ubhuhuru bhwa kemerano? Kitareeho ekegero chuchusi!

38 Hanu Umwana wu Umuntu ariiki na bhamaraika abharindu na ubhukuru bhwa Wiisi, aramororera zisuni umuntu wuwusi wanu akondorera inyi zisuni na amiija gaani, ribhaga rinu urwibhuru rana rokokora ubhusarya na kwibha Mungu.”

9

1 Yiesu akang'eha kubhabhurrira, “Nirabhabhurrira amaheene, bhareho abhaatu gati waanyu hanu, bhanu bhatakukwa bhakiri korora Umwana wu Umuntu araaza mubhutimi bhwazi.”

*Yiesu ariichura ubhushu
(Mataayo 17:1-13; Ruuka 9:28-36)*

2 Hanu zaahitiri siku isaasabha, Yiesu akagega Peetero, Yaakobho na Yoohana, akaja hamwimwi nabha kukiguru ikirihu bhakaja kegoro. Bhakarora Yiesu ariichura ubhushu bhwazi mubhutangi bhwabha.

3 Amiibhoho gaazi gakatanga kubharya bhukung'u. Gakabha miru ga pee, kukira chimbu umuhuri wuwusi kusi kanu angahuriri.

4 Bhakahwaruka Iriya na Musa,* abharutiriri bhi ikari, bharagambana na Yisu.

5 Peetero ewe akabharira Yisu, “Umwija, ni-bhwaheene itwi tubhi hanu. Twumbaki ibhituku bhitatu, ikimwi ichazu, ikindi cha Musa ni ikindi cha Iriya.”

6 Ataaminyiri ryu ukugamba, ku kubha ewe na abhakindichazi bhakubhaha bhakung’u.

7 Neho bhakarora risaaru, rikabhakundikirya. Riraka rya Mungu rikarwa mwisaaru, rikabhuga, “Wanu ni-Mwana waani umusiigwa, mumwitegeerere.”

8 Hanu abhiiga bharya bhaaruzibhu inu ni inu, bhataruzi umutu wundi, nawe Yisu umwene.

9 Hanu bhaari bhakwika kukiguru kirya, Yisu akabharecha bhatabharira umutu wawusi ganu bhaaruzi, kuhika hanu Umwana wa Umutu akubha aryukiri kurwa mubhaku.

10 Abhiiga bharya bhakarigwata ring’ana riyo, nawe bhakabha bhariibhuurya abheene kobheene, “Kuryuka kwazi mubhaku, enzobhooro yaku niki?”

11 Bhakabhuurya Yisu, “Ndora abhiija bhi imigiru ja Musa bahaabhuga, ereenderwa Iriya akangatiri Kiriisitu kuuza?”†

12 Ewe akabhagarukirya, “Maheene Iriya areenderwa kuuza hinga korereke aturi bhwaheene amang’ana gusi. Nangabhabhu, kwaki yandikirwi muMaandiku Amarindu kubha,

* **9:4 Iriya na Musa** bhaari abharuti abhakaruru. Musa akabhakangata Abhiiziriri kurwa Miisiri kuja mucharu cha Iziriri. Iriya aari ariisegwa kubha aragaruka kusi, Masiya akiiri kuuza. Rora Maraaki 4:5. † **9:11** Rora Maraaki 4:5-6.

Umwana wu Umuntu aranyaaka bhukung'u na koregwa?

¹³ Nawe nirabhabhurira kubha, Iriya† iziri, bhushi bhakamokorera amabhi guusi ganu bhindiri,§ chimbu yandikirwi.”

*Yisu arahorya umwana wunu ana risambwa
(Mataayo 17:14-21; Ruuka 9:37-43a)*

¹⁴ Hanu Yisu, Peetero, Yoohana na Yaakobho bhaahikiri kubhiga abhandi, bhakarora riribhita ikuru rya abhaatu ribhiiruguuriri. Abhiija bhi imigiru ja Musa bhaari bharahakaana na abhiga.

¹⁵ Hanu riribhita rirya ryaruzi Yisu, bhushi bhakarugura. Rogendo rumwi bhakamuryara, bhakamokeerya.

¹⁶ Yisu akabhabhuurya, “Murahakaaniraki nabhu?”

¹⁷ Umuntu wumwi mwiribhita rirya akagarukirya, “Umwija, nimuritiri umwana waani kwa naawi. Ana risambwa rinu rikugirya abhi imuumu.

¹⁸ Ibhaga ryasi hanu rihaamugwata, riramugwisha haasi. Ahaahurucha rihuru mumunywa, na kusha aminu na kuhangarara umabhiri. Nisabhiri abhiga bhaazu bhamuruushi, nawe bhataaturiri.”

¹⁹ Yisu akabhuga, “Imwi urwibhuru ranu rutakwisirirya, ranu rurimiiri! Niriikara na niimwi na kubhiigumirirya kuhika ryari?

† 9:13 Yisu araring'aa'ya **Iriya** na Yoohana Umubhatiizi. Yoohana akakorera Yisu inzira, emeremo ginu Abhayaahudi bhaari bhariisega kubha Iriya arakora. Rora Mataayo 11:13-14.

§ 9:13 Rora Maaroko 6:14-29.

Niriikara na niimwi na kubhiigumirirya kuhika ryuri? Momoreete hanu umwana wuyo.”

20 Bhakamuhira kwa Yisu. Nawe hanu risambwa ryaruzi Yisu, hayohayo rikamoteemerya umwana wurya ririmu. Akagwa haasi, akiibharingurabharingura na kuhurucha rihuru.

21 Yisu akabhuurya wiisi umwana, “Inyaaku yinu itangiri kwima ryuri?”

Wiisi akabhuga, “Kwima mubhwana bhwazi.

22 Manga kaaru risambwa riyo rimugwishiryi momorero hamwi mumanzi korereke rimwiti. Nawe aribhi uranaja kokora ryaryasi, tororere ibhigangi, utasakiryi.”

23 Yisu akamugarukirya, “Uriituri! Gusi garaturikana kwa wanu akwisirirya.”

24 Rogendo rumwi wiisi umwana wurya akarira kwa nguru, arabhuga, “Niriisirirya! Nawe ubhwisirirya bhwani bhutakwisa, nsakirya.”

25 Hanu Yisu aaruzi riribhita rya abhaatu riraaruha kumwiruguura, akarihaarira risambwa rirya, akabhuga, “Awi risambwa! Urakora umwana wanu kubha imuumu nu umuribhi wa amatwi. Nangu nirakubhurira, nuurwi kumwana wanu, na utagema kumujaku kwiki.”

26 Neho risambwa rirya rikarigisa bhukung’u, ririmu rikatiira, rikamurwiku. Umwana akabha nkina akuuri, bhaaru harya bhakabhuga, “Akuuri!”

27 Nawe, Yisu akamugwata okobhoko akamununga, neewe akiimirira.

28 Mmbe hanu Yisu aasikiiri munyumba, abhiiga bhaazi bhakamubhuurya kwa rusizu, “Kwaki itwi tukatamwa kumuruusha risambwa?”

29 Yisu akabhabhaurira, “Risambwa ncha rinu ritakutura koheebhwa taabhi kumasabhi.”*

Yisu aragamba naatu iguru wu ukukwa nu ukuryuka kwazi

(Mataayo 17:22-23; Ruuka 9:43b-45)

30 Yisu na abhiiga bhaazi bhakabhuuka iyo, bhakahitira gatigati wi icharu cha Gariraaya. Yisu ataasiigiri abhaatu bhamenye kubha ari iyo,

31 ku kubha aari arabhiija abhiiga bhaazi. Akabhabhaurira, “Umwana wu Umutu araja kuhurukibhwa mumabhoko ga abhaatu na bharamwita. Nawe urusiku rwa katatu kwima ukukwa kwazi, araryuka.”

32 Nawe, bhatubhauriri kinu Yisu aabhabhuriiri, bhakubhaha kumubhuurya.

Wiiwi umukuru mubhuti bhwa mwisaaru?

(Mataayo 18:1-5; Ruuka 9:46-48)

33 Yisu na abhiiga bhaazi bhakahika murubhiri rwa Kapirinaumu. Hanu bhaasikiiri munyumba, Yisu akabhabhuurya, “Mwari murahakaaniraki munzira?”

34 Neho abhiiga bhaazi bhakakira, ku kubha bhaari bharahakaana abheene kobheene kunzira, wiiwi gati waabhu umukuru kukira abhakindichazi.

35 Yisu akiikara haasi, akabhabhirikira abhiiga bhaazi ikumi na bhabhiri. Akabhabhaurira, “Umutu wanu akwenda kubha umukuru kwa

* **9:29 Kumasabhi**, Zibhibhuriya izindi zirabhuga, *kumasabhi na kwiya kurya*.

bhũsi areenderwa kwiya iyaasi, na kubha omohocha kwa bhũsi.”

³⁶ Akagega umwana, akamwimiirirya mubhutangi bhwabhu. Akamuhumbata, akabhabhũrira,

³⁷ “Umũtu wũwũsi wũũ araaginihiyi umwana ncha wũũ kuriina ryani, aranginihiya inyi. Nũ umũtu wũũ araanginihiyi inyi, atakunginihiya inyimwene. Amaheene araginihiya Mungu wũũ antumiri.”

Umũtu wũũ atakwanga Yũsu ari hamwimwi neewe

(Ruuka 9:49-50)

³⁸ Yoohana akamubhũrira, “Umwija, tukamorora umũtu araruusha amasambwa kuriina ryazu. Itwi tukagama komorecha, ku kubha atari hamwimwi na niitwi.”

³⁹ Yũsu akabhuga, “Mutamorecha, ku kubha atareeho umũtu wũũ areekore ikisigu kuriina ryani, naatu hasuuhubhu kũgamba inyi kibhi.

⁴⁰ Umũtu wũũ atakutwanga, ari hamwimwi na niitwi.

⁴¹ Umũtu wũwũsi wũũ ariibhahi amanzi nũũ masuuhu gu ukunywa, ku kubha imwi, ni-bhaatu bha Kiriisitu, nirabhabhũrira amaheene, atakubhurwa umubhanũ gwazi.”

Amaangiriji gu ukugirya abhaatu bhakore amabhi

(Mataayo 18:6-9; Ruuka 17:1-2)

⁴² Yũsu akang'eha kũgamba, “Nawe wũũ araa-habhiyi wũmwĩ gati wa abhasuuhu bhanũ bhakun-yiisirirya akore ubhubhi, inyaaku yaazi irabha kũũ bhũkũg'u. Hakiriku abhoherwe urubhwĩ mwigati na korekerwa mũnyanza.

⁴³ Okobhoko kwazu kuraagiryi okore ubhubhi, ukutini. Ni-hakiriku usikiri mubhuhuru bhwa kemerano no okobhoko kumwi, kukira kubha na amabhoko abhiri na kuja nyaari, momorero gungutakurima. [

⁴⁴ Iyo neyo zenyende zitakukwa, no omorero gwayo gutakurima.]

⁴⁵ Ukuguru kwazu kuraagiryi okore ubhubhi, ukutini. Ni-hakiriku usikiri mubhuhuru bhwa kemerano no obhorema bhwa ukuguru kumwi, kukira kubha na amaguru abhiri na korekerwa nyaari. [

⁴⁶ Iyo neyo zenyende zitakukwa, no omorero gwayo gutakurima.]

⁴⁷ Iriisu ryazu riraagiryi okore ubhubhi, ryihi. Ni-hakiriku usikiri ne esongo mubhatimi bhwa Mungu, kukira kubha na amisu abhiri na korekerwa momorero gwa nyaari.

⁴⁸ Iyo neyo zenyende zitakukwa, no omorero gwayo gutakurima.

⁴⁹ “Mungu arahitya abhaatu bhusi mazinyaaku zinu zituubhini no omorero, ncha abhaatu bhakuhaka umuny† kanyama yi ikimweso yinu ikiri kurichwa.‡

⁵⁰ Umuny ni-mazumu, nawe guriibhuryi ubhusambaruku bhwagwi, maragaturira kiguruki korereke gozome naatu? Na niimwi mubhi nchu umuny gungugwatiri, mubhi nu ubhwigwani abheene kobheene.”

† 9:49 Abhayaahudi bhakahaka inyama umuny kubha bhayeerye neho bharichi. Rora Abharaawi 2:13; Izikiri 43:24. ‡ 9:49 Ikigiriki kirabhuga, abhaatu bhusi bharaturwa umuny no omorero.

10

*Yisu ariija iguru wu ukukwira nu ukutaana
(Mataayo 19:1-12; Ruuka 16:18)*

¹ Necho Yisu na abhiga bhaazi bhakabhuka Kapirinaumu, bhakaja mucharu cha Yudeya. Bhakahita bhakaambuka ikitaaru cha Yorodaani. Iyo amaribhita makuru ga abhaatu bhaari bharamwiruguura naatu, na aari arabhija chimbu aanariri kokora.

² Mmbe, Abhafarisaayo bhakamujaku komogema. Bhakamubhuurya, “Awii, ni-bhwaheene umusubhi kutaana na mukaazi?”

³ Wusi akabhagarukirya, “Musa akabhaswaja migiruki?”

⁴ Bhakamugarukirya, bhakabhuga, “Musa akiisirirya umusubhi amwandikiri mukaazi inyarubha yu ukutaana.”*

⁵ Yisu akabhabhurira, “Musa akabhaandikira riswaja riyo ku kubha yu ubhukung’u bhwi imyuyu janyu.

⁶ Nawe, kwima ubhutangi bhwo okoteemwa isi, ‘Mungu akabhumba umusubhi nu umukari.’†

⁷ Iguru wa gayo, umusubhi aratiga wiisi na una, aragwatana na mukaazi.

⁸ Bhabhiri bhayo bharabha mubhiri gumwi.‡ Na bhatakubha bhabhiri kwiki, nawe ni-mubhiri gumwi.

⁹ Mmbe, kinu kigwataniibhwi na Mungu, mututu atakitaan’ya.”

¹⁰ Hanu bhaasikiiri naatu munyumba, abhiga bhaazi bhakamubhuurya iguru wi ing’ana yiyo.

* **10:4** Rora Amahiityu gi Imiguru 24:1. † **10:6** Rora Ubhutangi 1:27. ‡ **10:8** Rora Ubhutangi 2:24.

11 Akabhabhūrira, “Umūtu wunu araatiḡi mūkaazi na kukwira ūwandi, arasebheeta kumukari we embere.

12 Nu umukari wunu araatiḡi umusubhi waazi na kukwirwa nu umusubhi ūwandi, arasimbiba kumusubhi we embere.”

*Yīsu arasung’aana abhaana abhasuuhu
(Mataayo 19:13-15; Ruuka 18:15-17)*

13 Abhaatu bhaari bharareetera Yīsu abhaana abhasuuhu abhatūriri amabhoko. Nawe abhiiga bhaazi bhakabhahaarira.

14 Hanu Yīsu aabharūzi abhiiga bhaazi bharakorabhu, akiigatana. Akabhabhūrira, “Mubhatigi abhaana abhasuuhu bhaazi kwa niinyi, matabharecha, ku kubha ubhūtimi bhwa Mungu ni-bhwa bhanu bhaangi ncha abhaana.

15 Nirabhabhūrira amaheene, wawūsi wunu atakwisirirya ubhūtimi bhwa Mungu nchu umwana umusuuhu, atakusikira zee mubhūtimi bhuyo.”

16 Neho akabhahumbata abhaana bhayo, akabhatūrira amabhoko, akabhahaka.

*Ubhukung’u kumuniibhi kusikira mubhūtimi
bhwa Mungu
(Mataayo 19:16-26; Ruuka 18:18-30)*

17 Hanu Yīsu aatangiri kuja, umūtu wumwi akamuryarira, akamuhigamira. Akamubhuurya, “Umwija umazamu, nekorebhwī, korereke nigabhi ubhūhuru bhwa kemerano?”

18 Yīsu akamugarukirya, “Kwaki urambirikira umazamu? Atareeho umūtu umazamu, kuru-ushaku Mungu umwene.

19 Nawe nangu, ujizi imigiru ja Mungu ginu gikubhuga, 'Utiita, utasebheeta, utiibha, utagobha muutu, utakangirirya, usuki wuusu na onyoko.'§

20 Umutu wurya akabhuga, "Umwija, giyo jasi nigigwatiri kwima mubhwana bhwani."

21 Yisu akamorora, akamusiiga, akamubhurira, "Usuhiirwi ekegero kimwi. Nuuji uguryi ebhegero bhyasi bhina unabhyu, zimpirya ziyo ubhahi abhahabhi, na arabha ni ikibhumbika kwa Mungu. Akamara uuzi untuni."

22 Nawe, hanu iigwiribhu, akarugura. Akaja arumikiri bhukung'u, ku kubha aari ne ebhegero bhyaru.

23 Yisu akarora mbaara zusi, akabhabhurira abhiga bhaazi, "Kurabha kukung'u kubhaniibhi kusikira mubhutimi bhwa Mungu."

24 Abhiga bhaazi bhakarugura kamang'ana gaazi. Akabhabhurira naatu, "Abhaana bhaani, morore chimbu ni-kukung'u kusikira mubhutimi bhwa Mungu.*

25 Ni-kanyuhu ingamiya kuhita mwibhanga ryi isindanu, kukira umuniibhi kusikira mubhutimi bhwa Mungu."

26 Abhiga bhaazi bhakarugura bhukung'u kwa ring'ana riyo. Bhaari bhariibhuurya abheene kobheene, "Nangu, ni-wiwi wanu akutura kusabhurwa?"

§ 10:19 Rora kuhuruka 20:12-16; Amahiityu gi Imigiru 5:16-20.

* 10:24 *Ni-kukung'u kusikira mubhutimi bhwa Mungu*, Zibhibhuriya izindi zirabhuga, *ni-kukung'u kubhaatu bhanu bhakwisega ubhuniibhi bhanu bhanabhwu, kusikira mubhutimi bhwa Mungu.*

27 Yiesu akabharora, akabhabhaurira, “Kubhaatu gatakuturikana, nawe kwa Mungu guusi garaturikana.”

28 Peetero akamubhaurira, “Rora, itwi tutigiri ebhegero bhyasi, tukutuniri.”

29 Yiesu akabhuga, “Nirabhabhaurira amaheene, umuutu wanu atigiri inyumba, umwabha, umusubhaati, unina, wiisi, abhaana, hamwi imigundu, iguru waani ni iguru wi Ing’ana Inzumu,

30 Mungu aramoha bhyaru bhakung’u kukira bhirya. Nangu kwibhaga rinu, arasung’aana zinyumba, bhaumwabha, abhasubhaati, bhaunina, abhaana ni imigundu. Hamwimwi na gayo guusi, arabha ni inyaaku. Ni isi yinu ikuuza, arasung’aana ubhuhuru bhwa kemerano.

31 Nawe, abhaatu bhaaru bhanu bhakusuukwa ribhaga rinu, bhatakusuukwa ribhaga rinu rikuuza. Na bhanu bhatakusuukwa ribhaga rinu, bharasuukwa ribhaga rinu rikuuza.”

Yiesu aroongera kugambira ukukwa nu ukuryuka kwazi

(Mataayo 20:17-19; Ruuka 18:31-34)

32 Hanu Yiesu na abhiga bhaazi bhaari kunzira kuja murubhiri rwa Yirusariimu, Yiesu aari arakangata mubhutangi bhwabha. Abhiga bha Yiesu bhakarugura, na abhaatu abhandi bhanu bhaari bharamutuna, bhaari nu ubhwabha. Yiesu akabhabhirikira naatu rusiza abhiga bhaazi ikumi na bhabhiri, akatanga kubhabhaurira ganu gareemobhone.

33 Akabhuga, “Rora, turaja Yirusariimu. Iyo, Umwana wu Umuutu aragwatwa na kuhirwa

kubhakuru bha abhakuhaani na abhiija bhi imigiru ja Musa. Bhayo bharatinira iitwi, na bharamuhira kuBharuumi.

³⁴ Abhaatu bhayo bharamorega na kumutwira amati. Bharamotema imizariti na kumwita. Nawe, urusiku rwa katatu, araryuka.”

*Umukuru abhahokerye bhanu akukangata
(Mataayo 20:20-28)*

³⁵ Yaakobho na Yoohana, abhaana bha Zebhedaayo, bhakiisukira Yisu, bhakamubhaurira, “Umwija, turasabha otokorere ryaryasi rinu turikusabhi.”

³⁶ Yisu akabhabhuurya, “Moreenda nibhakorereki?”

³⁷ Bhakamubhaurira, “Utwisiririryi kwikara hamwimwi na naawi mubhugungu bhwazu, wamwi urubhaara rwu ubhuryu nu uwandi urubhaara rwu ubhamusi.”

³⁸ Yisu akabhabhaurira, “Mutizi kinu mukusabha. Nangu, muratura kunywa ekekombe chi inyaaku kinu nikunywa, kisha muratura kubhatiizwa ubhabhatiizi bhu ukukwa bhanu niraabhatiizwi?”

³⁹ Bhakamugarukirya, “Turatura.”

Yisu akabhabhaurira, “Maheene, murakinywira ekekombe chi inyaaku yinu inyi nikunyaaka, na kubha ni ibhaga ikung’u nchi iryani.†

† 10:39 **Kubha ni ibhaga ikung’u nchi iryani** kuKigiriki ni-murabhatiizwa chimbu inyi nabhatiizirwi.

⁴⁰ Nawe kwikara urubhaara rwani rwu ubhuryu hamwi rwu ubhumi si gitari emeremo jani kubhiisiririrya. Umweya guyo ni-ku bhanu Mungu amariri kokonzera.”

⁴¹ Hanu abhiga abhakindichabhu ikumi bhiigwiri gayo, bhakatanga kubhiigatanira Yaakobho na Yoohana.

⁴² Neho Yisu akabhirikira abhiga bhumi, bhisuki kwawi. Akabhabhurira, “Mwizi kubha abhakangati bhi ibhyaru bharakangata abhaatu bhaabhu kwa amanaga, na abhaku bhaabhu bharabhahocha emeremo.

⁴³ Nawe kwa niimwi, itakubhabhu. Umuntu wanu akwenda kubha umukuru waanyu, arenderwa kubha omohocha waanyu.

⁴⁴ Nu umuntu wanu akwenda kubha we embere gati waanyu, areenderwa kubha mbusa waanyu.

⁴⁵ Nu Umwana wu Umuntu atiiziri kuhakiribhwa, nawe akaaza kohokerya abhaatu na kuhurucha ubhuhuru bhwazi bhubi ubhutuurya kubhaatu abhaaru.”

Yisu arahorya umuhuku

(Mataayo 20:29-34; Ruuka 18:35-43)

⁴⁶ Mmbe bhakahika kurubhiri rwa Yiriko, na hanu Yisu na abhiga bhaazi bhaabhuukiri Yiriko, riribhita ikuru rya abhaatu rikabhatuna. Munzira iyo bhakabhona umuntu wamwi iriina ryazi Bharitimaayu, umwana wa Timaayu. Umuntu wuyo aari muhuku. Akiikara rusizu wi inzira arasabha zimpirya.

⁴⁷ Hanu iigwiri kubha Yisu wa Nazariiti arahita harya, akatanga kurira kwiraka ikuru, “Yisu,

Umwana wu umutimi Daudi,‡ ndorera ibhigangi!”

48 Abhaatu bhaaru bhakamuhhaarira kubha akiri. Nawe ewe akang’eha kurira kwiraka ikuru bhukung’u, “Umwana wu umutimi Daudi, ndorera ibhigangi!”

49 Neho Yisu akiimirira, akabhuga, “Mumubhirikiri aazi hanu.”

Bhakamubhirikira, bhakamubhuurira, “Thaana umwayu, imirira! Arakubhirikira.”

50 Akataasha engebho yaazi haasi, akabhuka bhwangu, akaja kwa Yisu.

51 Yisu akamubhuurira, “Oreenda nekokoreki?”

Umuhuku wurya akamubhuurira, “Umwija, nereenda nerore.”

52 Yisu akabhuga, “Nuuji, ubhwisirirya bh-wazu bhukuhiriri.” Hayohayo, akatanga korora, akatuna Yisu kunzira.

11

*Yisu arasung’aanwa Yirusarimu ncha Masiya
(Mataayo 21:1-11; Ruuka 19:28-40; Yoohana
12:12-19)*

1 Hanu Yisu na abhiiga bhaazi bhiisimiri urubhiri rwa Yirusarimu, bhakahika haguhi kuzimbiri za Bhitifagi na Bhitaniya, kukiguru chi Imiziyituuni. Yisu akatuma bhabhiri mubhiiga bhaazi,

2 akabhuga, “Muji murubhiri ranu rore embere waanyu. Hanu mukusikira iyo, murabhona umwana wi itikiri, wanu akiri kogega muttu, abhuhirwi. Mumutazuri, momoreete hanu.

‡ 10:47 *Umwana wu umutimi Daudi.* Kumaragirira bhukung’u, rora Ikiniibhasa.

3 Na umuntu wawusi araabhabhuuryi, ‘Kwaki murakorabhu?’ mumabhuuriri, ‘Umukuru aramwenda, aramugarucha nangwinabhu.’”*

4 Mmbe bhakaja, bhakabhona umwana wi itikiri abhahirwi igutu wi ikisika kunzira ikuru, bhakamatazura.

5 Abhaatu obhorebhe kubhanu bhaari bhiimi-iriiri harya, bhakabhabhuurya, “Imwi! Kwaki muratazura umwana wi itikiri wuyo?”

6 Abhiga bharya bhakagarukirya chimbu Yisu aari abhabhuuriiri bhabhugi. Mmbe abhaatu bhayo bhakabhiisiririrya.

7 Bhakahira umwana wi itikiri kwa Yisu, na kwara zengebho zaabhu iguru wi itikiri yiyo. Yisu akiikara iguru wayu.

8 Abhaatu bhaaru bhakaara zengebho zaabhu kunzira, abhandi bhakatina amatutu mumigundu na kwara kunzira iguru wu ukusuka Yisu.

9 Abhaatu obhorebhe bhaari bharakangatira Yisu, abhandi bhaari bharamutuna inyuma. Bhusi bhaari bharatiirya riraka bharabhuga, “Akumibhwi!

Anu urubhangu wanu akuuza kuriina ryu Umukuru!†

10 Anu urubhangu Umutimi wu ubhutimi bhwa sukuru wiitu Daudi bhenu bhukuuza! Akumibhwi Mungu wa mwisaaru!”

11 Yisu akasikira Yirusarimu, akaja, akasikira mwihekaaru.‡ Akabherora bhwaheene ebhegero bhyusi bhinu bhyari bhirimu. Nawe ku kubha

* 11:3 Rora Zaakariya 9:9. † 11:9 Rora Zabhuri 118:25-26.

‡ 11:11 **Rihekaaru.** Kamaragirira bhukung’u, rora Ikiniibhasa.

yaari rigoroobha, akabhũũka, akaja hamwimwi na abhũga bhaazi ikumi na bhabhiri Bhitaniya.

*Yĩsu arihiima umuti gunu gutaana imisumu
(Mataayo 21:18-19)*

¹² Hanu tabhũuri waho Yĩsu na abhũga bhaazi bhaari bhararwa Bhitaniya, kugaruka Yirusariimu, inzara ikamurya.

¹³ Akarora umutiini kwa kore, gunu gwari gugutiri. Akagwisukira arore ariibhi guni imisumu. Hanu aahikiri harya, akabhona gutaana imisumu, gwizwiri amatũtu ageene, ku kubha ribhaga ryu ukutwara ryari rikiiri kuhika.

¹⁴ Mmbe akagubhũũrira umuti gurya, “Kwima reero utiibhura misumu, kemerano.” Abhũga bhaazi bhakiigwa amang’ana garya.

*Yĩsu araheebha abhasuruja mwihekaarũ
(Mataayo 21:12-17; Ruuka 19:45-48; Yoozana 2:13-22)*

¹⁵ Hanu bhaahikiri Yirusariimu, Yĩsu akasikira mwihekaarũ. Akatanga koheebha abhaatu bhanu bhaari bhakugurya, na kugura ebhegero. Akabharingura zemeeza za bhanu bhaari bhakukiran’ya zimpirya, ni ibhitumbi bhya bhanu bhaari bhakugurya ibhiguuti.

¹⁶ Na atamwisiririiryi umũtu wuwũsi kogega ekegero chũchũsi chu ukugurya kuhita mwihekaarũ.

¹⁷ Akumara Yĩsu akabhiija, akabhuga, “Itaandikirwi muMaandiku Amarindu kubha, ‘Inyumba yaani irabha ya amasabhi kubhaatu

bhi ibhyaru bhyusi?'§ Nawe imwi, muyikuriri kubha ribhigi rya abhasaakuri!"*

18 Hanu abhaku ru bha abhakuhaani na abhiija bhi imigiru ja Musa bhiigwiri gayo guusi, bhakatanga komohya inzira yu kumwita ku kubha bhaari bharamuhaha. Na bhakamwubhaha, ku kubha abhaatu bhushi bhaari bhararuguuribhwa na amiija gaazi.

19 Hanu rigoroobha ryahikiri, Yisu na abhiga bhaazi bhakabhuka marubhiri.

Yisu ariija iguru wa ukusabha Mungu kubh-wisirirya

(Mataayo 21:20-22)

20 Hanu ritabhuri ryaho bhaari bhakugaruka marubhiri rwa Yirusarimu, bhakabhona umuti gurya gwu umutiini gwumiri gwusi kwimira kumiri jaku.

21 Peetero akahiita amang'ana ganu Yisu aagambiri, akamubhurira, "Umwija, rora! Umuti gwu umutiini ganu wihiimiri, gwumiri!"

22 Yisu akabhabhurira, "Mwisiriryi Mungu.

23 Nirabhabhurira amaheene, ariibhi umutu ariisirirya na ataana makibhwi mumwayu gwazi, rinu araabhugi rirakorwa. Aratura kubhurira ikiguru kinu, 'Ihika witaashi manyanza,' na gayo garakorwa.

24 Iguru wa gayo nirabhabhurira kubha, hanu mokosengera na kusabha chuchusi, mubhi nu ubhwisirirya kubha musung'aaniri, na niimwi marabhona.

§ 11:17 Rora Isaaya 56:7. * 11:17 Rora Yirimiya 7:11.

25 Na hanu mukusabha, mobheerere wuwusi wunu abhasaririiryi. Neho Bhaabha waanyu wa mwisaaru arabhabheerera amabhi gaanyu. [

26 Nawe ariibhi imwi mutakobheerera abhandi, na Wuusu wa mwisaaru atakubhabheerera ubhubhi bhwanyu.]”

*Ubhunaja bhwa Yisu bharabhuuriribhwa
(Mataayo 21:23-27; Ruuka 20:1-8)*

27 Yisu na abhiga bhaazi bhakahika naatu Yirusarimu. Hanu bhaari bharagenda mwi-hekaaru, abhakuu bha abhakuhaani, abhiija bhi imigiru ja Musa na abhakaruka bhakamujaku

28 kumubhuurya, “Ganu okokora, urakora kwa bhunajaki? Ni-wiwi wunu akuhiiri ubhunaja bhwo okokora gayo?”

29 Yisu akabhuga, “Na niinyi nirabhabhuurya ring’ana rimwi, mungarukiryi, akumara nirabhabhuurira, nirakora gayo kubhunaja bhwa wiwi.

30 Mumburiri, ubhunaja bhwa Yoohana bhwu ukubhatiiza, bhukarwa hayi? Bhukarwa kwa Mungu wa mwisaaru kisha kubhaatu?”

31 Bhakatanga kugambana abheene kobheene, “Turaabhugi, ‘Bhukarwa mwisaaru,’ aratubhu-urya, ‘Nangu, ndora mutamwisiriiryi?’

32 Nawe, turaabhugi, ‘Bhukarwa kubhaatu,’ abhaatu bharatwigatanira.” Bhaari bharubhaha abhaatu, ku kubha abhaatu buusi bhakamwisirirya Yoohana aari umuruririri wa amaheeneheene.

33 Neho bhakamugarukirya, “Tutizi.”

Wuusi akabhabhurira, “Na niinyi nitakubhabhurira nirakora amang’ana ganu kwa bhunajaki.”

12

Ekerenjo cha abharimi abhabhi

(Mataayo 21:33-46; Ruuka 20:9-19)

¹ Yiesu akatanga kugambana na abhakangati bha Abhayaahudi bharya kobherenjo. Akabhuga, “Kwari na umuntu wumwi wanu aarimiri umugundu gwi imizabhiibhu. Akagubhagira, akatuka ikisima chu ukugundikira imizabhiibhu girya. Akumbaka ikikungu ikirihu cha abhariibhi mumugundu. Akakudishirya abharimi. Ewe akaja icharu ikindi.

² Ribhaga ryu ukutwa zizabhiibhu rikahika, akamutuma wumwi wa bhambuusa bhaazi kubharimi bharya, bhamohe esondo yaazi ya zizabhiibhu kurwa mumugundu gwazi.

³ Nawe, abharimi bhakagwata mbuusa, bhakamotema, bhakamuhurucha mabhoko bhuha.

⁴ Wu umugundu akatuma mbuusa uwundi kubharimi. Wuusi bhakamotema na kumunyahaara kumutwi, na komokorera kibhi bhukungu.

⁵ Akatuma mbuusa waazi uwundi, wuusi abharimi bhakamwita. Akabhatuma bhambuusa bhaazi abhandi bhaaru. Abharimi bharya bhakabhatema, abhandi bhakabhiita.

⁶ Wu umugundu akasaaga na wumwi, umwana waazi umusiigwa. Itiniru akamutuma kubharimi bharya, akiiseega, ‘Bharamusuka umwana waani.’

7 “Nawe, hanu aahikiri, abharimi bharya bhaki-ibhuurira, ‘Wunu newe umugabhi wu umugundu gunu. Nangu, tumwiti. Igabhu yaazi yinu irabha iyitu.’

8 Bhakamugwata, bhakamwita, bhakamorek-
era igutu wu umugundu gurya.

9 “Nangu wu umugundu wuyo arakorabhwi? Araaza na kubhiita abharimi bharya, nu umugundu guyo, arabhaha abhaatu abhandi.

10 Nangu, mukiri kosoma Amaandiku ganu? ‘Riibhwi rinu abhuumbaki bhaangiri, neryo ribhiri riibhwi rikuru rya rusizu.*

11 Umukuru umwene akuriri ganu, nego gararuguurya kwa niitwi.†”

12 Abhakuru bha abhakuhaani, abhiija bhi imigiru ja Musa na abhakuru, bhakoobhoora kubha ekerenjo kiyo nebho kikugambira. Neho bhakeenda kumugwata, nawe ku kubha bhakubhaha riribhita rya abhaatu, bhakamutiga, bhakabhuka.

*Yisu arabhuuribhwa iguru wu ukuriha riguti
(Mataayo 22:15-22; Ruuka 20:20-26)*

13 Neho abhakuru bha Abhayaahudi, bhakatuma Abhafarisaayo obhorebhe na abhasakirya bha riribhita ryu umutimi Heroode Antipaasi, bhahaaty Yisu kuring’aana na amang’ana gaazi umwene.

* **12:10 Riibhwi rikuru rya rusizu** ryari rereenderwa kuryumbaka rya Abhayaahudi. Rikagwatan’ya nyiki ibhiri na kugwatirira inyumba ngima. † **12:11** Rora Zabhuri 118:22-23.

14 Bhakamujaku, bhakamubhurrira, “Umwija, tuminyiri kubha, gusisi ganu ukubhuga, ni-ga amaheene. Utakwubhaha wawusisi, nauru abhi nu umweya gwi iguru. Uriija inzira ya Mungu kumaheene. Nangu, kuring’aana ni imigiru ja Musa, toreenderwa kuriha riguti kwa Kaisaari,‡ kisha ziya?”

15 Nawe Yisu akoobhoora eng’eera yaabhu, akabhabhurrira, “Kwaki murangema? Mondeetere rizenzere nerore.”

16 Bhakamuhirira, akabhabhuurya, “Ipicha yinu ni riina rinu, ni-bhya wiwi?”

Bhakamugarukirya, “Bhya Kaisaari.”

17 Yisu akabhabhurrira, “Bhya Kaisaari mohe Kaisaari, na bya Mungu mohe Mungu.” Bhusi bhakarugura bhukung’u.

*Yisu ariija iguru wu ukuryuka abhaku
(Mataayo 22:23-33; Ruuka 20:27-40)*

18 Kwari na riribhita rimwi rya Abhayaahudi rinu rikubhirikirwa Abhasadukaayo.§ Ebho bhaari bharabhuga kuryuka kwa abhaku kutareeho. Urusiku rumwi, obhorebhe bhwabhu bhakaja kwa Yisu, bhakamubhuurya,

19 “Umwija, Musa akatutuma, ‘Ariibhi umutu akuuri, na atigiri umukari waazi ataana umwana, umuhiiri waazi agabhi umukwirwa wuyo, amwibhuriri abhaana umwabhu wenu akuuri.’* ”

‡ 12:14 **Kaisaari.** Kamaragirira bhukung’u, rora Ikinibhasa.

§ 12:18 **Abhasadukaayo.** Kamaragirira bhukung’u, rora Ikinibhasa. * 12:19 Rora Amahiitya gi Imigiru 25:5-6.

²⁰ Nangu, tubhugi bhaareho abhahiiri muhun-gati. We embere akakwira umukari, nawe akakwa aari akiiri kwibhura mwana.

²¹ Umunyi waazi akagabha umukari wuyo, nawe wusi akakwa, ataatigiri mwana. Na wa katatu ikabhabhu.

²² Bhusi bhasaasabha bhanu bhaamugabhiri na wurya aamukwiriri, bhakakwa, bhataatigiri mwana. Itiniru, umukari wuyo wusi akakwa.

²³ Nangu tubhuriri, hanu abhaku bhakuryaka, umukari wuyo arabha muka wiwi? Muhungati bhayo bhusi bhaari bhamukwiriri!”

²⁴ Yisu akabhabhurira, “Imwi mubhuriri, ku kubha mtiizi Amaandiku Amarindu naabha ubhunaja bhwa Mungu.

²⁵ Hanu abhaku bhakuryaka, bharabha ncha bhamaraika bha mwisaaru bhatakukwira naabha kukwirwa.

²⁶ Ni iguru wa abhaku kuryaka, ni-maheene. Nangu, mikiiri kosoma mkitabha cha Musa, chimbu Mungu aagambiri kukisaka kinu kik-waka omorero? Hanu Mungu aamubhuuriiri Musa, ‘Inyi ni-Mungu wa Abhurahaamu, Iisaka na Yaakobho.’†

²⁷ Mungu ni-wa abhahuru, atari Mungu wa ab-haku. Imwi mubhuriri bhukung’u.”

Riswaja rikuru kukira guusi

(Mataayo 22:34-40; Ruuka 10:25-28)

²⁸ Hanu Yisu aari arahakaana na Abhasadukaayo, umwija wumwi wi imigiru ja Musa akahika, akiigwa kinu bhakuhakaana. Hanu igwiri kubha Yisu abhagarukiiryi bhwaheene,

† 12:26 Rora Kukuraka 3:6.

akamubhuurya, “Mamaswaja gusisi, ryu abhutangi ni-ryahe?”

²⁹ Yiesu akamugarukirya, “Ryu abhutangi ni-rinu, ‘Mwitegeerere imwi Abhiizirairi! Umukuru Mungu wiitu, newe Umukuru umwene.

³⁰ Umusiigi Umukuru Mungu waazu kumwuyu gwazu gwasi, kokoro yaazu yusi, kumang’ini gaazu gusisi na kumanaga gaazu gusisi.”[‡]

³¹ Na rya kabhiri ni-rinu, ‘Umusiigi nyarubhiri waazu chimbu wisigiri aumwene.’§ Ritareeho iswaja rindi ikuru kukira abhiri gayo.”

³² Umwija wi imigiru wuyo akabuurira Yiesu, “Umwija, ugambiri amaheene kubha Mungu ni-wumwibhu, atareeho wundi, nawe ewe umwene.

³³ Naatu niizi kubha ereenderwa kumusiiga Mungu kumwuyu gwasi, kumang’ini gusisi na kumanaga gusisi, na kusiiga nyarubhiri waazu chimbu wisigiri aumwene. Gayo nego amaswaja amakuru bhukung’u. Amang’ana gayo ni-makuru kokora kukira kuhurucha ibhimweso bhyusi bhyu ukurichwa ni ibhimweso ibhindi.”

³⁴ Hanu Yiesu aaruzi kubha amutu wuyo agarukiiryi kwa amang’ini, akamabuurira, “Nangu awi utangiri kwobhoora chimbu ikwenderwa kusikira mubhuti bhwa Mungu.” Kwima hayo, ataabhanikiri kwiki amutu wundi wa komogema kumubhuurya.

*Yiesu arabhuurya Abhafarisaayo iguru wa Kiri-
isitu*

(Mataayo 22:41-46; Ruuka 20:41-44)

[‡] **12:30** Rora Amahiityu gi Imigiru 6:4-5.
haraawi 19:18.

§ 12:31 Rora Ab-

35 Hanu Yisu aari ariija abhaatu mwihekaaru, akabhabhurira, “Kwaki abhiija bhi imigiru ja Musa bhahaabhuga Kiriisitu ni-mwana wu amatimi Daudi?

36 Hanu Daudi umwene aakangatirwi ne Egoro Indindu, akabhuga, ‘Umukuru Mungu akabhabhurira Umukuru waani, “Ikara urubhaara rwani rwu ubhurya, kuhika hanu nikutwura abhabhisa bhaazu iyaasi wa amaguru gaazu.”’*

37 “Mmbe, Daudi umwene arabhuga Kiriisitu ni-Mukuru, kugayo Kiriisitu arabhabhwi mwana waazi?” Riribhita ikuru rya abhaatu ryari riri-itegerera Yisu kobhozomerwa.

*Yisu newe Umukuru wa bhusi
(Matayo 23:1-36; Ruuka 20:45-47)*

38 Mumija gaazi, Yisu akabhuga, “Mwiyangariri na abhiija bhi imigiru ja Musa. Bhanu bhasigiri kogenda kunzira bhiibhuri zikanzu za-abhu na kukiribhwa kubhusuuku mometeera.

39 Na mumarwaziru, bhahaasiiga kwikara kubhitumbi bhye embere. Na ariibhi bharaarikirwi kuzinyangi, bhahaasiiga kwikara hanu abhakan-gati bhiikiri.

40 Bhahaaruusha abhakwirwa ebhegero bhyabhu. Na bhariikorya ni-bhaatu bhagururuku ku kusabha amasabhi marihu bhukung’u korereke bhiiyeereken’ye kwa abhaatu. Kurusiku rwi itiniru, abhaatu bhayo bharahaabhwa itiniru kuru bhukung’u.”

* 12:36 Rora Zabhuri 110:1.

*Ikimweso chu umukwirwa
(Ruuka 21:1-4)*

⁴¹ Yġisu akiikara haguhi ne ekegero chu ukuhuru kirya ikimweso mwihekaarū. Aari ararora abhaatu bharatūra ikimweso mukihūzu kirya. Abhaniibhi bhaaru bhakahurucha zimpirya nzaru.

⁴² Akaaza umukari wumwi umukwirwa umuhabhi, ewe akahurucha mazenzerē abhiri masuuu.

⁴³ Hanu Yġisu aarūzi gayo, akabhabhirikira abhiiga bhaazi, akabhabhurira, “Nirabhabhurira amaheene, umukari umukwirwa umuhabhi wuyo, ahurukiryi zimpirya nzaru mukihūzu kukira bhūsi bhanu bhahurukiryi.

⁴⁴ Niragambabhu ku kubha abhaatu abhandi bhūsi bhahurukiryi amasaaju gu ubhwaru bhwe ebhegero bhyabhu. Nawe umukari wunu, nu ubhuhabhi bhwazi, ahurukiryi bhyūsi bhinu anabhyu mubhwikari bhwazi.”

13

*Yġisu aragambira ukusaribhwa kwa rihekaarū
(Mataayo 24:1-2; Ruuka 21:5-6)*

¹ Hanu Yġisu aari ararwa mwihekaarū hamwimwi na abhiiga bhaazi, wumwi wa abhiiga bhaazi akabhuga, “Umwija, rora amabhwī amakuru na amakindasi amakuru ganu gararuguurya!”

² Yġisu akamubhurira, “Urarugura amanyumba amakuru ganu? Guusi gayo garaashwa, ritareeho ibhwī rinu rikusaaga iguru wi irindi!”

*Yïisu ararootorera ñnyaaku yinu ikuuza
(Mataayo 24:3-14; Ruuka 21:7-19)*

³ Hanu Yïisu aari iikiiri kukiguru chi Imiziyituuni, aari ararora ubhushi bhwa rihekaaru. Peetero, Yaakobho, Yoohana na Andureya hanu bhaari abheene hagari, bhakamubhuurya,

⁴ “Turasabha utubhushiriri, gayo ukugamba garahuruka ryuri? Ni-chirikin’yuki kinu kereereken’ye kubha, gayo gari haguhi kuhuruka?”

⁵ Neho Yïisu akatanga kubhabhushirira, “Mwanagariri, umuntu wuwusi ataaza kubhakangirirya!

⁶ Abhaatu bhaaru bharaaza kuriina ryani, bharabhuga, ‘Inyi ni-Kiriisitu,’ na bharakangirirya abhaatu bhaaru.

⁷ Hanu muriigwi iguru wa riihi na amang’ana ga riihi, mutakangwa. Gayo gareenderwa gakorwe, nawe itiniru yi iisi irabha iikiiri.

⁸ Icharu kimwi kiriitana ni icharu ikindi, ubhatimi bhumi bhuriitana na ubhatimi ubhundi. Kurabha ni ibhirigitu bhyi iisi bhya hanu na harya ni inzara hagero haaru kuusi. Gayo guusi garabha chimbu ubhutangi bhwa ubhusungu bhwa umukari wanu akwenda kwibhura.

⁹ “Nawe imwi, mwiyangariri bhukung’u. Abhaatu bharabhahira kubhakangati na abhatimi mumarwaziru. Bharabhahira mubhutangi bhwa abhakangati na abhatimi iguru waani. Moreenderwa kubha abhaminyiikiriri bhaani mubhutangi bhwabha.

¹⁰ Ing’ana Inzumu ereenderwa irwazwi mubhyaru bhyusi itiniru iikiiri kuhika.

¹¹ Hanu abhaatu bhayo bhakubhakwesa na kubhahira kubhyandaruru na kubhatinira,

matanyaaka ga kugamba, nawe mugambi ganu Mungu ariibhahi ribhaga riyoriyo. Itari niimwi imubheene marigambi, amaheene ne-Koro Indindu yinu iri muusi waanyu neyo ikubhasakirya kugamba.

¹² “Umuhiiri ariichura umuhiiri waazi korereke iitwi. Wiisi ariichura umwana waazi, na abhaana bhariitan’ya abhiibhuri bhaabhu na kugirya bhi-itwi.

¹³ Abhaatu bhushi bharabhabhihirirwa iguru waani. Nawe wunu ariigumiriryi kuhika itiniru, newe araasabhuki.”

Inyaaku ikuru iyindi iraaza

(Mataayo 24:15-35; Ruuka 21:20-33)

¹⁴ Wunu akosoma amaandiku ganu, obhoore enzobhooro ya amaangiriju ga Yisu ganu, “Ribhaga irebhe murarora ubhururu bhunu umuruatiriri Danyiri aabhugiri ubhasarya. Neho abhaatu bhanu bhari Yudeya, bhang’osere mubhiguru!

¹⁵ Umuntu wunu ari iguru kukisara chi inyumba, atiika korereke agege ebhegero bhinu bhiri munyumba, ang’ose.

¹⁶ Na wunu akubha mumugundu ang’ose, atiichura inyuma kogega zengebho zaazi.

¹⁷ Tarabharorera ibhigangi abhakari bhanu bharinda na bhanu bhakubha bharakoocha zisiku ziyo.

¹⁸ Musabhi kubha, zisiku ziyo zitabhoneka ribhaga rye embeho.

¹⁹ Zisiku ziyo zirabha zi inyaaku kuru, yinu ikiiri kuhuruka nuru hasuuhu, kwima hanu Mungu aatimiri icharu, kuhika ribhaga riyoriyo. Na itakobhoneka kwiki yindi.

20 Angabhiiri Umukuru atasuuhyza zisiku ziyo, ataari areho umuntu wawuzi wanu aari akusabhuka. Nawe, Mungu arasuuhyza zisiku ziyo, ku kubha aradhiira abhaatu bhanu aarubhwiri.

21 “Na ribhaga riyo, umuntu wawuzi araabhamburiri, ‘Rora, Kiriisitu ari hanu!’ hamwi, ‘Ari irya!’ mutiisirirya.

22 Bharabhaho abharutiriri bhu ururimi na abhaatu bhanu bhakwibhikira Kiriisitu. Bha-reereken’ya ibhyirikin’ya na amateemo, korereke bhageme kurimirya abhaatu, iritirikani nuru abharobhorwa bha Mungu.

23 Mmbe imwi, mwiyangariri! Inyi nikangatiri hinga kubharecha guzi gayo gakiiri kuhuruka.

*Yisu aragambira ukugaruka kwazi
(Mataayo 24:29-31; Ruuka 21:25-28)*

24 “Nawe, zisiku ziyo, hanu inyaaku yiyo iraahti, iryubha riratuurwa ikiirimya nu umwiri gwuzi gutakuhurucha ubhwiru bhwagwi.*

25 Zenzota zuzi ziragwa haasi kurwa mwisaaru. Ebhegero bhyuzi bhya mwisaaru bhirasingisa.†

26 “Neho abhaatu bhuuzi bharaarore Umwana wu Umuntu araaza mamasaru kwa nguru nzaru nu ubhukuru.‡

27 Aratuma bhamaraika bhaazi bhabhiringi abharobhorwa bhaazi kurwa mbaara zuzi inyi zi isi.

28 “Mwigi kurwa kamuti gwu umutiini. Hanu mokorora ibhisha bhirasibhuka na amatutu gabhaririyi, maramenya kubha ribhaga rya rigesa rirariiri.

* 13:24 Rora Isaaya 13:10. † 13:25 Rora Isaaya 34:4. ‡ 13:26 Rora Danyiri 7:13; Ubhwirikibhwa 1:7.

²⁹ Ibhuibhu, hanu muraarore gayo gatangiri, mo-
menye kubha ari haguhi kuuza.

³⁰ Nirabhabhurira amaheene, ribhaga ryu ur-
wibhuru runu ritakuhita kuhika gayo guusi gako-
rwe.

³¹ Risaaru ni isi bhirahita, nawe ing'ana yaani
itakuhita kemerano.

*Mungu umwene izi urusiku rwu ukugaruka kwa
Yisu
(Mataayo 24:36-44)*

³² “Nawe, iguru wu urusiku na ribhaga ryu uku-
uza, atareeho umuntu wanu yizi. Naabha bhama-
raika bha mwisaaru hamwi Umwana, bhuusi
bhatizi, nawe Bhaabha Mungu umwene newe
yizi.

³³ Mwangariri! Motengeeze, [musabhi], ku
kubha mutizi ribhaga riyo rirahika ryuri.

³⁴ “Amang'ana gayo garabha nchu umuntu wanu
akuja orogendo kurwa munyumba yaazi. Akab-
hatigira bhambusa bhaazi bhariibhi inyumba.
Akabhasondya bhuusi emeremo jabhu jo okokora,
akaswaja umuriibhi wi ikisiku wusi, atengeeze.”

³⁵ “Mmbe imwusi motengeeze, ku kubha mutizi
kubha wi inyumba aragaruka ryuri. Mutizi
ariibhi aragaruka rigoroobha, hamwi ubhutiku
gati, hamwi mozengoko, hamwi ritabhuri.

³⁶ Motengeeze, korereke araabhahumbukiji,
atabhona zibhahiriri.

³⁷ Rinu nikubhabhurira imwi, nirabhurira ab-
haatu bhuusi, bhatengeeze.”

14

*Abhakangati bha Abhayaahudi bhariiseemerya
kwita Y#su
(Mataayo 26:1-5; Ruuka 22:1-2; Yoozana
11:45-53)*

¹ Zikasaaga siku ibhiribhu, ihiki isigukuru yi Ipasaka,* ni yi Imikaati Ginu Gitari Mitunduuru. Abhakuru bha abhakuhaani na abhiija bhi imigiru ja Musa, bhaari bharamohya inzira yu kugwata Y#su kwa mbisi, bhamutini na kumwita.

² Nawe bhakabhuga, “Tutigi hinga isigukuru ihiti, neho tumugwati, abhaatu bhataaza kokora ikimpugi.”

*Umukari arahaka Y#su amaguta
(Mataayo 26:6-13; Yoozana 12:1-8)*

³ Ribhaga riyo Y#su aari Bhitaniya, wa Simuni wunu aari ne ebhege. Hanu aari kwigari, akaaza umukari wumwi ani ichupa inzamu ya amaguta ga naridu. Amaguta gayo gaari gi iguri ikuru, na garareetya bhwaheene. Akatina umunywa gwi ichupa, akiitururira Y#su kumutwi.

⁴ Abhaatu obhorebhe bhanu bhaari munyumba yirya, bhakiigatana. Bhakatanga kugamba abheene kobheene, “Ndora arasarya amaguta amazumu ganu?”

⁵ Amaguta ganu gakeenderwa kuguribhwa zidinaari magana atatu,† na kubaabhwa abhahabhi.” Bhakahaarira umukari wurya.

* **14:1 Ipasaka.** Kumaragirira bhakung'u, rora Ikiniibhasa. † **14:5 Zidinaari magana atatu** zaari ni-marihi gu amutu kumwaka gumwi.

6 Nawe Yisu akabhuga, “Mumutigi. Ndora maramunyaacha? Rinu umukari wanu ankuriri ni-zumu.

7 Abhabhi munabhu siku zushi. Muratura kubhakorera amazumu ribhaga ryurusi rinu musingiri. Nawe inyi nitakubha na niimwi siku zushi.

8 Umukari wanu akuriri rinu akutura. Akangatiri kuhaka umubhiri gwani amaguta iguru wa amabhiika gaani.

9 Nirabhabhurira amaheene, hushushi mubhyaru hanu abhaatu bhakubha bhararwaza Ing’ana Inzumu, bharabha bharagamba rinu umukari wanu aakuriri, kumuhiita.”

*Yuuda Isikariyuti ariisirirya kwichura Yisu
(Mataayo 26:14-16; Ruuka 22:3-6)*

10 Neho Yuuda Isikariyuti, wumwi wa abhiiga ikumi na bhabhiri bha Yisu bharya, akaja kumwichura kubhakuu bha abhakuhaani, abheereche inzira yu ukugwata Yisu.

11 Hanu bhiigwiri amang’ana gayo, bhakazomerwa bhakung’u. Bhakiisiriran’ya nawe kubha bharamoha zimpirya. Neho Yuuda akatanga komohya umweya umazumu gu ukumwichura.

*Yisu ararya ipasaka na abhiiga bhaazi
(Mataayo 26:17-25; Ruuka 22:7-14, 21-23;
Yoohana 13:21-30)*

12 Rwari urusiku rwe embere rwi isigukuru yi Imikaati Ginu Gitari Mitunduuru, urusiku ranu abhaatu bhaari bhariita iking’andu chi ipasaka. Abhiiga bha Yisu bhakamubhuurya, “Oreenda tuji hayi tokokorere ahagero hu ukurira ipasaka?”

13 Neho Yisu akatuma abhiga bhabhiri, akabhabhaurira, “Muji marubhiri rwa Yirusarimu, iyo marahunana nu umusubhi wamwi agigiri inywa, mumutuni.

14 Munyumba yinu ariisikiri, muji mamubhauriri umwene nyumba, ‘Umwija arasabha utwereche igati hanu araariiri Ipasaka hamwimwi na abhiga bhaazi.’

15 Neho umwene nyumba arabheerecha igati ahakuru mogorofa, hakunzirwi kimwi. Mototengere muyo, turiiri Ipasaka.”

16 Abhiga bharya bhakabhuka, bhakaja marubhiri rwa Yirusarimu. Bhakabhona gusi gari chimbu Yisu aabhabhuuriiri, bhakatenga ibhyakurya bhyi Ipasaka.‡

17 Hanu ryahikiri rigoroobha, Yisu akahika munyumba yirya hamwimwi na abhiga bhaazi ikumi na bhabhiri bharya.

18 Hanu bhaari bhararya, Yisu akabhuga, “Nirabhabhaurira amaheene, wamwi waanyu, wusi ararya hamwimwi na niinyi, aranyiichura.”

19 Abhiga bhaazi bhakatanga kurumika. Bhakamubhuurya wamwi wamwi, “Nangu niinyi?”

20 Akabhabhaurira, “Ni-wamwi waanyu gati wi ikumi na bhabhiri, wanu akokorya hamwimwi na niinyi mubhakuri.

21 Maheene Umwana wu Umutu araja kukwa, chimbu Amaandiku Amarindu gakubhuga iguru waazi. Nawe, horeera kumutu wanu ariichuri Umwana wu Umutu! Yaari hakiriku kwewe atan-gibhwirwi!”

‡ 14:16 Rora Kukuraka 12:3-11.

Ibhyakurya bhyu Umukuru Yisu
(Mataayo 26:26-30; Ruuka 22:14-23; 1
Abhakurintu 11:23-25)

²² Hanu bhaari bhararya, Yisu akagega umukaati, akabhurira Mungu, azumiryi. Akagusunyura, akabhaha abhiga bhaazi, akabhuga, “Mogege, muryi, ganu negwe umubhiri gwani.”

²³ Akumara, akagega ekekombe chi idivaayi, akabhurira Mungu, azumiryi, akabhaha arabhuga, “Mogege, munyi imwi bhusi.

²⁴ Ganu nego amasaahi gaani gu ubhuragi, § ganu gakwitika iguru wa abhaatu bhaaru.

²⁵ Nirabhabhurira amaheene kubha, nitakunywa naatu idivaayi kuhika hanu nikunywa bhuhya mubhutiimi bhwa Mungu.”

²⁶ Akumara bhakimba iryimba ryu ukukumya Mungu. Bhakabhuka hayo, bhakaja kukiguru chi imiziyituuni.

Yisu ararora kubha Peetero aramwanga
(Mataayo 26:31-35; Ruuka 22:31-34; Yoohana
13:36-38)

²⁷ Hanu bhaari kunzira, Yisu akabhurira abhiga bhaazi, “Imwusi muraang’osa kuganu gakuheruka. Garabha chimbu Mungu aagambiri muMaandiku Amarindu, ‘Niramwita umuriisha, na zing’undu zaazi ziranyaragana.’*
²⁸ Nawe hanu nikuryuka, nirabhakangatira kuja Gariraaya.”

§ 14:24 *Ubhuragi*. Kugaragira bhukang’u, rora ikiniibhasa.

* 14:27 Rora Zaakariya 13:7.

29 Neho Peetero akamubhaurira, “Nangabha abhakindichani bhushi bharakutiga, inyi nitakukutiga.”

30 Yisu akamubhaurira, “Nirakubhaurira amaheene, ubhutiku bhwa reero, ekorokoome itakuhiita kugamba kabhiri, urabha unyangiri katatu.”

31 Nawe Peetero akoongera kukandikija kubha, “Nangabha kukwa, nikwi hamwimwi na naawi, nitakukwanga zee!” Na abhiga bhushi abhakindichazi bhakabhuga muyomuyo.

*Yisu arasabha Gitisimani
(Matayo 26:36-46; Ruuka 22:39-46)*

32 Hanu bhaahikiri kukiguru chi Imiziyituuni, bhakaja mubhusitaani yinu ikubhirikirwa Gitisimani. Yisu akabhaurira abhiga bhaazi, “Mwikari hanu, ribhaga rinu inyi nikusabha.”

33 Akagega Peetero, Yaakobho na Yoohana, akaja nabhu kore hasuuhu, akatanga kwitiimaata na kanyaaka bhukung’u mokoro.

34 Akabhabhaurira, “Ekoru yaani irumikiri bhukung’u, ekerengo chu ukukwa. Mwikari hanu, motengeeze.”

35 Yisu akiisuka embere hasuuhu, akagwa haasi. Akasabha, “Iriturikani, nitahitira ribhaga ryi inyaaku rinu.”

36 Akabhuga, “Bhaabha, kwa naawi guusi garaturikana. Nirakusabha unduushiryi ekekombe chi inyaaku kinu. Itari chimbu inyi nikwenda, nawe gakorwe chimbu awi ukwenda.”

37 Hanu aagarukiri kubhiga bhaazi bhatatu bharya, akabhona bhahindiiri. Akabhuurya

Simuuni Peetero, “Simuuni, zihiriri? Utamirwi kotengeeza nuru kwi isa yimwi?”

³⁸ Neho akabhabhurira, “Motengeeze na kusabha, mataaza kusikira mubhiti-imotiimo. Ekoru iriisirirya, nawe umubhiri ni-munyuhiriru.”

³⁹ Yisu akabhuka, akaja kusabha rusizu, akagarukira kugamba amang’ana garyagarya.

⁴⁰ Hanu aagarukiri rwa kabhiri kubhiga bhaazi, akabhona bhahindiiri, akabhabhuucha, ku kubha bhakarwa mozendooro. Bhataari na rya kumugarukirya.

⁴¹ Yisu akarwa kwiki kusabha rwa katatu, akabhabhurira, “Nangu muhindiri mwoyeere, yisiri. Ribhaga ryi inyaaku yaani rihikiri. Umwana wu Umutu aragwatwa na kuhirwa mumabhoko ga abhakuri bhu ubhubhi.

⁴² Mubhuki, tuji. Rora, wanu akunyiichura ari haguhi.”

Yisu aragwatwa

(Mataayo 26:47-56; Ruuka 22:47-53; Yoohana 18:3-12)

⁴³ Hanu Yisu aari akiri aragamba gayo, hayohayo Yuuda, wumwi wa abhiga bhaazi ikumi na bhabhiri, akahika na abhaatu bhaaru, bhanu bhagwatiriiri amasabha na amarungu mumabhoko. Abhaatu bhayo bhakarwa kubhakuru bha abhakuhaani, abhija bhi imigiru ja Musa na abhakaruka.

⁴⁴ Yuuda wanu iichuriri Yisu, aari abhahiri ichirikin’yu, arabhuga, “Umutu wanu niraahumbati, momenye, newe. Mumugwati na kubhuka nawe, mumuturi mozemboko.”

⁴⁵ Hanu Yuuda aahikiri harya, akaja bhwima kwa Yisu, akabhuga, “Umwija!” Akamuhumbata.

⁴⁶ Abhaatu bharya bhakagwata Yisu.

⁴⁷ Neho, umutu wamwi mubharya bhanu bhi-imiiriiri harya hamwimwi na Yisu, akasohora risabha ryazi, akatina ukutwi kwa mbusa wa kuhaani umukuru kutu.

⁴⁸ Yisu akabhurira abhaatu bharya, “Ndora mwiziri na amasabha na amarungu, mungwati inyi, ncha abhaatu bhanu bhakuja kugwata umusaakuri?”

⁴⁹ Kirakabhu naari hamwimwi na niimwi, nirija mwihekaaru, mtaangwatiri. Nawe ganu gusi gakurirwi korereke ganu gaandikirwi muMaandiku Amarindu, gakorwe.”†

⁵⁰ Neho abhiga bhaazi bhusi bhakaryara, bhakamutiga.

⁵¹ Kwari nu umumura wamwi wanu ifiriryi engebho, aari aratuna Yisu. Bhakagama kumugwata,

⁵² nawe akasubhuka mumabhoko, akatiga umwenda gwazi, akaryara mwegu ari tuhu.

Yisu mubhutangi bhwiichandarukikuru cha Abhayaahudi

(Mataayo 26:57-68; Ruuka 22:54-55, 63-71; Yoojana 18:13-14, 19-24)

⁵³ Neho abhaatu bharya bhakahira Yisu kwa kuhaani umukuru. Bhakiibhiringa harya abhakuru bhusi bha abhakuhaani,‡ abhakaruka na abhiija bhi imigiru ja Musa.

† 14:49 Rora Maaroko 14:27; Zaakariya 13:7. ‡ 14:53 **Abhakuhaani.** Kmaragirira bhukung’u, rora ikiniibhasa.

54 Peetero akabha aratuna Yisu kwa kore. Akaja, akasikira mwigooobhe rya kuhaani umukuru. Akiikara murya hamwimwi na abhariibhi bha kuhaani umukuru, akabha aroota omorero.

55 Abhakuru bha abhakuhaani ni ichandaru§ chusi bhakatanga komohya obhomenyeekererya bhwa ukugamba Yisu, korereke bhamutiniri na kumwita. Nawe, bhataari bharabhona obhomenyeekererya bhwabhwasi.

56 Abhaatu bhaaru bhaari bharahurucha obhomenyeekererya bhwa ururimi kugamba Yisu, nawe obhomenyeekererya bhwabhu bhataari bhuriigwana.

57 Akumara, abhaatu abhandi obhorebhe bhakiimirira, bhakahurucha obhomenyeekererya bhwa ururimi. Bhaari bharabhuga,

58 “Itwi abheene tukiigwa umutu wanu arabhuga, ‘Inyi niragwisha rihekaaru rya Mungu rinu abhaatu bhumbakiri. Na nirumbaka irindi kwa siku isatubhu. Rihekaaru riyo ritakumbakwa na abhaatu.’”

59 Nuruabhu, obhomenyeekererya bhwabhu bhataari bhuriigwana.

60 Akumara kuhaani umukuru akiimirira embere wi ichandaru. Akabhuurya Yisu, “Awii, utakagarukirya ing’ana ryaryusi, rinu abhaatu bhanu bhakukugamba?”

61 Nawe Yisu akakira kiri, ataagambiri ing’ana ryaryusi. Kuhaani umukuru akang’eha kumubhuurya, “Awi ni-Kiriisitu, Umwana wa Mungu wanu akukumibhwa?”

§ 14:55 *Ichandaru*. Kumaragirira bhukung’u, rora Ikinibhasa.

62 Yîsu akagarukirya, “Inyi newe. Na niimwi murarora Umwana wu Umuntu ikiri urubhaara rwu ubhurya rwa Mungu wa Amanaga.* Na muramorora araaza mamasaa kurwa mwisaaru.”†

63 Neho kuhaani umukuru akatarandura zengebho zaazi kwerecha asaayiri bhukung’u, akabhuga, “Ni-bhamenyeekereryaki bhanu tukwenda?

64 Mwigwiri abheene chimbu akorega Mungu! Nangu imwi, murabhugabhwî?” Ichandaru chasi kikabhuga areenderwa iitwi.

65 Abhandi bhakatanga kumutwira amati, komobhoha mubhushu na komotema ibhikundi, inu bharamubhurira, “Rootorera ni-wiwi wanu akutimiri!” Na abhariibhi bhanu bhaari harya, bhakamogega, bhakamotema.

Peetero araanga Yîsu

(Mataayo 26:69-75; Ruuka 22:56-62; Yoohana 18:15-18, 25-27)

66 Ribhaga riyo ryasi, Peetero aari mwigoobhe, iyaasi wi ichumba hanu Yîsu aari arabhuuribhwa. Akaaza omohocha wumwi wi ikikari wa kuhaani umukuru.

67 Akarora Peetero aroota omorero, akamogorera. Akamubhurira, “Na naawi waari hamwimwi na Yîsu, Umunazariiti.”

68 Nawe Peetero akaanga arabhuga, “Nitizi na nitakwigwa ganu ukugamba!” Akaja kukishoko cha rigoobhe. Ribhaga riryarirya, ekorokoome ikagamba.

* 14:62 Rora Zabhuri 110:1. † 14:62 Rora Danyiri 7:13.

⁶⁹ Umukari wuyo akarora Peetero, akatanga kubhukurira abhaatu bhanu bhiimiiriiri harya, “Umuntu wanu wusi ari hamwimwi nabhu.”

⁷⁰ Nawe Peetero akaanga kwiki.

Rikahita ibhaga isuuhu, abhaatu bhanu bhiimiiriiri harya, bhakamubhukurira, “Amaheene awi ni-wumwi waabhu, ku kubha na naawi Mugariraaya uri.”

⁷¹ Nawe, Peetero akatanga kwihimiriya na kwirahira, “Umuntu wanu mukugamba, inyi nitamwizi!”

⁷² Hayohayobhu, ekorokoome ikagamba rwa kabhiri. Ribhaga riyo, Peetero akahiita ring’ana rya Yisu rinu aamubhuuriiri, “Ekorokoome ikiiri kugamba manga kabhiri, urabha unyangiri katatu.” Peetero hanu isiigiri gayo, akarira.

15

Yisu arahirwa kwa Piraato

(Mataayo 27:1-2, 11-14; Ruuka 23:1-3; Yoohana 18:28-38)

¹ Hanu bhwiriribhu, ichandarū chusi cha abhakuru bha abhakuhaani, abhakaruka na abhiija bhi imigiru ja Musa, bhakiisiriran’ya. Bhakabhoha Yisu, bhakamuhira kwa Piraato.

² Piraato akamubhuurya, “Awi naawi umutimi wa Abhayaahudi?”

Yisu akamugarukirya, “Awi ugambiri.”

³ Abhakuru bha abhakuhaani bhaari bharamugamba kubha akuriri amabhi maaru.

⁴ Piraato akamubhuurya naatu, akabhuga, “Utakugarukirya ing’ana ryaryasi? Rora chimbu bhakukugamba awi amabhi amaru.”

⁵ Nawe Yisu atamugarukiiryi chuchusi. Neho Piraato akarugura!

*Piraato aratinira Yisu
(Mataayo 27:15-26; Ruuka 23:13-25; Yoohana 18:39-19:16)*

⁶ Musigukuru yi ipasaka, Piraato aari ni isimuka yu ukumutigurukira omobhohwa wumwi, wanu abhaatu bhaari bhakusabha atazurwi.

⁷ Ribhaga riyo mokebhoho bhaari mu abhaatu bhanu bhiichuriri na kokora ubhwiti mubhwangi bhwabhu. Wumwi wa abhiiti bhayo aari arabhirikirwa Bharaabha.

⁸ Riribhita ikuru rya abhaatu bhakaja kwa Piraato, bhakamusabha abhatazuriri omobhohwa wumwi, chimbu aanariri kokora.

⁹ Piraato akabhabhuurya, “Nangu, moreenda nibhatazuriri umutimi wa Abhayaahudi?”

¹⁰ Akagambabhu ku kubha akamenya kubha abhakuru bha abhakuhaani bhakamuhira Yisu kwewe iguru we eng’eera yaabhabhu.

¹¹ Nawe abhakuru bha abhakuhaani bhakasi-igirirya riribhita rya abhaatu rirya, rikasabha Piraato abhatazuriri Bharaabha.

¹² Piraato akabhabhuurya naatu, “Mmbe, moreenda nekorebhwi umutimi wanu mukubhuga ni-mutimi wa Abhayaahudi?”

¹³ Abhaatu bhawisi bhakarigisa bharabhuga, “Mumubhambi kumusarabha!”

¹⁴ Piraato akabhabhuurya, “Asariryiki?”

Neho ebho bhakang’eha kurigisa bhakung’u, bharabhuga, “Mumubhambi kumusarabha!”

¹⁵ Piraato kwa kusiga kusambarucha riribhita rya abhaatu riyo, akabhatazurira Bharaabha. Akaswaja abhasirikari korereke bhateme Yisu

imizariti, bhakamotema. Akumara akamuhurucha bhamubhambi kumusarabha.

*Abhasirikari bharasiihya Yisu
(Mataayo 27:27-31; Yoozana 19:2-3)*

¹⁶ Abhasirikari bhakagega Yisu, bhakaja nawe mwikuru rya Piraato. Bhakabhiringa riribhita ikuru rya abhasirikari.

¹⁷ Bhakamwibhohya engebho ya zambaraawi. Bhakagisa ikirungu cha amahwa, bhakamwibhohya kumutwi.

¹⁸ Bhakatanga komokeerya kwa kusiihya, “Morembe, amatimi wa Abhayaahudi!”

¹⁹ Bhaari bharamotema kumutwi na rikari na kumutwira amati, bhakamuhigamira kwa kumukumya.

²⁰ Hanu bhaamariri kumusiihya, bhakamuruusha engebho ya zambaraawi yirya, na kumwibhohya naatu zengebho zaazi. Bhakamuhira bhamubhambi kumusarabha.

*Yisu arabhambwa kumusarabha
(Mataayo 27:32-44; Ruuka 23:26-43; Yoozana 19:17-27)*

²¹ Kunzira, bhakarumana nu umutu wanu aari akubita kurubhiri kurwa mumugundu, iriina ryazi Simuni kurwa Kireene. Umutu wuyo aari wiisi Arikizanda na Ruufu. Abhasirikari bhakamuhatika agege umusarabha gwa Yisu.

²² Bhakahira Yisu hanu haabhirikiirwi Guriguuta, enzobhooro yaku ni-kukihanga chu Umutwi.

23 Bhakaha Yisu idivaayi yinu bhaasangiin'yi nu umati,* nawe ewe akaanga kunywa.

24 Neho bhakamubhamba kumusarabha, na bhakatwana zengebho zaazi. Bhakakora ubh-wituri kuhitya wiiwi aragega engebhoki.

25 Ribhaga rinu bhaamubhambiri, yaari isa isatu ritabhuri.

26 Bhakatwura iguru wu umusarabha amaandiku guubhubhi bhwazi, gaari garabhuga, “UMUTIMI WA ABHAYAHUDI.”

27 Bhakamubhamba na abhasaakuri bhabhiri kumisarabha, uwumwi urubhaara rwazi rwu ubhuryu nu wuandi urubhaara rwu ubhumusi. [

28 Neho gakakunana Amaandiku Amarindu ganu gakubhuga, “Akabharwa hamwimwi na abhakuri bha amabhi.”†]

29 Abhaatu bhanu bhaari bhakuhita kunzira hayo, bhakamutuka, bharasingisha imitwi jabhu bharabhuga, “Aa! Awi, wunu akwasha rihekaaru na kuryumbaka kuzisiku isatu,

30 nangu, wiituuryi aumwene, wiiki kumusarabha!”

31 Na abhakuru bha abhakuhaani na abhiija bhi imigiru ja Musa bhusi hamwimwi, bhakamorega bharabhuga, “Akasabhura abhandi, nawe atakutara kwisabhura umwene!

32 Angu, abhugiri kubha newe Kiriisitu, umutimi wa Abhiizirairi. Nangu iiki kumusarabha, korereke tomorore nu ukumwisirirya.” Na abhaatu bhanu bhaabhambirwi hamwimwi nawe, bhusi bhakamutuka.

* 15:23 *Umati* guyo garabhirikirwa manimani, bhakamoha iguru wo okomorega, gwari ganu ubhuru. † 15:28 Rora Isaaya 53:12.

Uruku rwa Yisu
(Mataayo 27:45-56; Ruuka 23:44-49; Yoohana 19:28-30)

³³ Kutangira zisa isaasabha umwise kuhika zisa kenda, ikabha ikiirimya kucharu chusi.

³⁴ Neho zisa kenda, Yisu akarira kwiraka ikuru arabhuga, “Iruyi! Iruyi! Raama sabhakitaani?” Enzobhooro yaku ni—“Mungu waani, Mungu waani, ndora untigiri?”[‡]

³⁵ Abhaatu obhorebhe gati wa bhanu bhiimi-iriiri harya, hanu bhiigwiri ganu akugamba, bhakabhuga, “Mwigwi bhamura, arabhirikira iriya amarutiriri wa Mungu.”[§]

³⁶ Umuntu wumwi akaryara bhwangu kotobheka ripuupya umarwa amaruru gi idivaayi, akabhohera kwikuri ririhu. Akarinanga iguru, akaha Yisu anywi. Umuntu wuyo akabhuga, “Mutigi torore arubhi iriya araaza kumwicha kumasarabha hayo!”

³⁷ Yisu akarira kwiraka ikuru, akatin’ya.

³⁸ Ripaziya ryu ukusikira Aharindu ha Aharindu mwihekaaru* rikabhaaruka, mbaara ibhiri kuhika iyaasi. ³⁹ Umukuru wa abhasirikari wanu aari imiiriiri embere wa Yisu, hanu aaruzi

[‡] 15:34 Rora Zabhuri 22:1. § 15:35 Iriya aragambwa hanu ku kabha Abhayaahudi bhaaru bhaari bhariisirirya kabha iriya atakuuri, nawe Mungu akamogega kusi hanu mahuu na kuja nawe mwisaaru. Na bhaari bhariisega kabha iriya aragaruka kwiki kusi. Rora 2 Abhatimi 2:11; Maraaki 4:5. * 15:38

Ripaziya ryu ukusikira Aharindu ha Aharindu mwihekaaru riyo ryari mwihekaaru, rirakinga abhaatu bhasikira Aharindu ha Aharindu, hanu ubhwiru bhwa Mungu bhwikiri. Rora Abhibhuraaniya 6:19, 10:19-22. Kumaragirira bhakang’u, rora ring’ana *rihekaaru* muKiniibhasa.

chimbu Yisu akukwa, akabhuga, “Heene umuntu wanu aari Umwana wa Mungu!”

⁴⁰ Bhaareho abhakari bhanu bhaaruuzi kwa kore. Gati waabhu aareho Mariyamu wa Magidarena, Sarome na Mariyamu unina Yaakobho umusuuhu na Yoose.

⁴¹ Abhakari bhayo bhaari bhamutuniri na kohokerya Yisu hanu aari mucharu cha Gariraaya. Bhaareho na abhakari abhandi bhaaru bhanu bhagiiri hamwimwi nawe Yirusariimu.

Yisu arabhiikwa

(Mataayo 27:57-61; Ruuka 23:50-56; Yoohana 19:38-42)

⁴² Hanu ryahikiri rigoroobha, ku kubha urusiku ruyo rwari rwu ukwitura bhwaheene, iguru wu urusiku rwa ubhuturu,[†]

⁴³ akaaza umuntu wamwi wanu akubhirikirwa Yuusufu, umwibhurwa wu urubhiri rwa Ari-mataaya. Aari wu ubhusuuku bhukung’u, wa muchandaru ikikuru cha Abhayaahudi, na aari ariisega ubhutimi bhwa Mungu bhanu bhuku-uza. Akaja kwa Piraato kwa bhukaari kumwasabha amwisiririyi aji agege ikitundu cha Yisu.

⁴⁴ Hanu Piraato iigwiri kubha bhwangubhu Yisu akuuri, akarugura! Akamubhirikira umukuru wa abhasirikari wurya korereke amenyeekererye ariibhi maheene Yisu akuuri.

⁴⁵ Hanu aaminyiikiriiryi kubha Yisu akuuri, Piraato akiisiririyi Yuusufu agege ikitundu.

[†] 15:42 *Ubhuturu* bhukatanga hanu iryabha ryatubhiiri Ijumaa kuhika hanu ryatubhiiri Jumamusi. Amaswaja ga Abhayaahudi gatakwisiririyi kubhika umuntu urusiku rwa ubhuturu.

⁴⁶ Neho Yuusufu w^usi akagura isanda ya zimpirya nzaru. Akiicha ikitundu kurwa kum^usarabha, akakiringira ni isanda. Akabhiika ikitundu kirya mumbihira yin^u yaakirisirwi kwitari, akahiringitya riibhwi ik^uru na kuribha kukisik^u chi imbihira.

⁴⁷ Na Mariyamu wa Magidarena na Mariyamu unina Yaakobho musuuhu na Yoose, bhakarora han^u aabhiikirwi.

16

Yisu araryuka

(Mataayo 28:1-8; Ruuka 24:1-12; Yoozana 20:1-10)

¹ Han^u urusik^u rw^u ubhuturu rwahitiri, Mariyamu wa Magidarena, Saroome na Mariyamu unina Yaakobho, bhakagura amaguta go okoreetya, bhaji bhahaki ikitundu.

² Urusik^u rw^u ubhutangi rwi inyuma* ritabhuri, han^u iryabha ryatangiri kosomoka, bhakaja kumbihira ya Yisu.

³ Han^u bhaari manzira, bhakatanga kwibhu-urya, “Ni-wiwi w^un^u akuturuushirya riibhwi rirya kukisik^u chi imbihira?”

⁴ Nawe han^u bhaahikiri, bhakarora riibhwi rirya rihiringitiibhwi, riri rusiza, na ryari ik^uru bhakung’u.

⁵ Han^u bhaasikiiri mumbihira, bhakiitacha korora mumura w^umwi ibhuhiri engebho nziru. Iikiri urubhaara rwu ubhurya rwi imbihira.

* **16:2 Urusik^u rw^u ubhutangi rwi inyuma** kaBhayaahudi ni-Jumapiri.

6 Neho akabhabhũũrira, “Mutuubhaha! Nĩzi maramohya Yĩsu wa Nazariĩti, wũũ aabhambirwi. Atari hanũ! Aryukiri, morore hanũ bhaamũĩĩri.

7 Muji mubhũũriri abhĩga bhaazi, kinda Peetero kubha, Yĩsu arabhakangatira kuja Gariraaya. Iyo neyo muraamorore chimbu aabhabhuuriĩri.”†

8 Hanũ bhiigwiribhu, bhakatanga kurigita kwa bhwaubha na kurugũra. Bhakarwa mumbihira hayo mweka. Bhataabhuuriĩri mũũtu wũwũsi, ku kubha bhakũubhaha.

*Yĩsu arahwarũkĩra Mariyamu wa Magidarena
(Mataayo 28:9-10; Yoohana 20:11-18)*

[
9 Hanũ Yĩsu aaryukiri ritabhũũri urusiku rwũ ubhutangi rwi inyuma, akamuhwarũkĩra hinga Mariyamu wa Magidarena, wũũ aari amuruushiryĩ amasambwa muhungati.

10 Mariyamu akaja, akabhabhũũrira bhanũ bhaari hamwimwi na Yĩsu, na ribhaga riyo bhaari bhararĩra na kwarama.

11 Nawe hanũ bhiigwiri kubha Mariyamu akamorora mũũru, bhatiisiriĩryĩ.

*Yĩsu arabhahwarũkĩra abhĩga bhabhĩri
(Ruuka 24:13-35)*

12 Urusiku ruyoruyo, Yĩsu akahwarũkĩra abhĩga bhaazi bhabhĩri, aari ni ikisisi kindi. Abhĩga bharya bhaari kũnzira bhararwa Yĩrusariĩmu.

13 Bhũũsi bhakagarũka kubhabhũũrira abhakindichabhũ, nawe abhĩga bhayo bhatiisiriĩryĩ.

† 16:7 Rora Maaroko 14:28.

*Yiesu arahwarukira abhiga bhaazi
(Mataayo 28:16-20; Ruuka 24:36-49; Yoohana
20:19-23; Amahocha ga Abhatumwa 1:6-8)*

¹⁴ Mutiniru, Yiesu akahwarukira abhiga bhaazi ikumi na wumwi, hanu bhaari kwigari bhararya. Akabharecha kubhukung'u bhwi imyuyu jabhu, ku kubha bhaangiri kwisirirya ga abhakindichabhu bhanu bhaaruzi Yiesu hanu aaryukiri mubhaku.

¹⁵ Neho akabhabhurira, "Muji mubhyaru bhyusi, mubharwaziri abhaatu bhusi Ing'ana yaani Inzumu.

¹⁶ Wunu wusi ariisiriryi na kubhatiizwa, arasabhurwa. Nawe, wunu araangi kwisirirya, aratinirwa.

¹⁷ Abhaatu bhanu bhariisiriryi, bharakora ibhyirikin'yu bhinu, ukuruusha amasambwa kubhaatu kuriina ryani, ukugamba ibhigambu ibhihya,

¹⁸ bhangagwata nzoka hamwi bhanganywa kegero cha kwita, kitakubhanyahaara. Bharabha bharatwara amabhoko gaabhu kubharwiri, bhusi bharahora."

*Yiesu aragegwa kuja mwisaaru
(Ruuka 24:50-53; Amahocha ga Abhatumwa
1:9-11)*

¹⁹ Hanu Umukuru Yiesu aamariri kugambana nabhu, Mungu akamogega kuja mwisaaru. Aki-ikara urubhaara rwu ubhurya rwa Mungu.

²⁰ Abhiga bhaazi bharya bhakabhuka, bhakaja kurwaza Ing'ana Inzumu hagero husi. Umukuru Yiesu aari arabhaha amanaga go okokora ibhyirikin'yu. Nimbu aari aramenyeekererya amang'ana gayo kubha ni-ga amaheene.]

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553